

ርእሰ ኢሰያስ አፍወርቂ ሞሰኮ አተ



ርእሰ ኢሰያስ አፍወርቂ እብ ዐዙመት ርእሰ ሽላድሚር ፑቲን ዲብ ፈደሬሽን ናብ ናይ አርባዕ ኣምዕል ዝያረት ረሰምየት እግል ሊዲ፡ ማሌ 30 ማዕ 2023 ሳዕት

1:30 ኣገህር ሞሰኮ አተ።

ርእሰ ኢሰያስ ዐባዩ ጋሽ ሕሽመት እተ ልትከቡቶ ዲቡ እድንያይ መከረዩ ሞያራት

ሸንኮሽ-2 ዶል አተ፡ ናይብ ርእሰ ሽኡን ካርጅየት ናብ ሚስተር ናደንኮ ኣንድሬ እብ ናይ ሕሽመት ኣሴራር ወነሺድ ክልኢተን ድወል ለተሌት ከብቱ ናይረት ወደ



እግሉ።

ዲብ ዓደት ከብቱ ሰፊር ኤረትርዮ ዲብ ፈደሬሽን ናብ አሰይድ ጴጥርስ ጸጋይ ወሰፊር ፈደሬሽን ናብ ዲብ ኤረትርዮ ሚስተር ኢጎር ሞዝጎ ሓድራም ዐለው።

ውቁላም ሰብ ሰልጠት ናብ፡ ዲብ ጠወርት ዕላቀት ኤረትርዮ ወሩሰዩ ክምሰልሁመ አትሐዘዮት ሕበር ዲብ ብእቱ ቅደይ ወተጠውራት እግል ልህደግ ቱ።

ወዚር ካርጅየት ኤረትርዮ አሰይድ ዑስማን ሳልሕ ወመፈወድ ዓዓት ወርያደት ሰፊር ዘመዴ ተኽሊ፡ ምሰል ርእሰ ኢሰያስ አፍወርቂ ሰፋራም ህለው።

ርእሰ ኢሰያስ ዲብ ፈደሬሽን ናብ ለጸንሐን ኣምዒላት፡ ምሰል ርእሰ ፑቲን ወብዕዓም

ልእኮታት አሰናይ ልተላሌ ህለ



ርእሰ ፈደራልየት ጅምሁርየት ሶማል ሐሰን ሼክ መሕመድ፡ ርእሰ ኢማራት መሐመድ ቢን ዛይድ አልናህያን፡ መልክ ኡርዱን ዐብዱላሂ ካልኦይ፡ ርእሰ ሱርየ በሻር አል-አሰድ፡ ርእሰ ሀንጋሪ ካታሊን ኖቫኽ፡ ርእሰ ማልታ ጆርጅ ሼላ፡ ኣሚን ዓም መነዘመት ምጅልስ ቅራን ኣንቶንዮ ጉተረሼ፡ ኣሚን ዓም መነዘመት ነብረ ወሐርስ (FAO)፡ ኣሚር ደውለት ክዌት-ነዋፍ አልኣሕመድ አልጃብር

አልሳባሕ፡ ወሊ አልኣሕድ ምሽዓል አልኣሕመድ አልጃብር አልሳባሕ ወርኢስ ውዘራእ አሕመድ ነዋፍ አልኣሕመድ አልሳባሕ፡ ርእሰ ጅምሁርየት አልጃዛር ዐብዱልመጃን ተቡን ወርኢስ ጅምሁርየት ዛምብዩ ሃክያንዴ ሂቺሌማ፡ እብ መናሰበት 32ይት-ሰነት ዒድ ሕርየት፡ ዲብ ሽዑብ ወሕኩመት ኤረትርዮ ልእኮት አሰናይ ነድአው። እሊ ክእነ ዲብ እንቱ፡ ናእብ

ርእሰ ውዘራእ ወርኢስ ካሪጃየት ፈደራላይት ዲሞቅራቲያይት ጅምሁርየት አቶብዩ ደመቂ መኮነን ወወዚር ቀድያት ካርጅ ፍልስጤም ዶክቶር ሪያድ አልማልኪ፡ እለ ለትሽብህ ጽበጥ ለበ ልእኮት አሰክ ወዚር ካሪጃየት አሰይድ ዑስማን ሳሌሕ ናድኣም ህለው።

ለሚርሐት ዲብ ርሳለቶም፡ እግል ርእሰ ኢሳይያስ አፈወርቂ ዓፍየት-ታመት፡ እግል ኤረትርዮ ወሻዕበ ህዩ ረህየት ወተጠውር እንዴ ተምነው፡ ምስንዮት ድወሎም ወመነዘማቶም ምሰል ኤረትርዮ እግል ወቀሎት ለሶም ምራድ ሸርሐው።

ርእሰ ኢሰያስ አፈወርቂ አሰክ ርእሰ ጅምሁርየት ትርክ ጠይብ ኦርዶጋን ልእኮት አሰናይ ነድአ

ርእሰ ኢሰያስ አፈወርቂ፡ ርእሰ ጅምሁርየት ትርክ ጠይብ ኤርዶጋን እግል ካልኦይት ደርበት እብ ድግማን ርእሰ እንዴ ገኣብ ምን ተሐረ ናይ አሰናይ ልእኮት ነድአ።

ርእሰ ኢሰያስ እተ እብ ሰሚት ሽዑብ ወሕኩመት ኤረትርዮ እብ ሰሚቱ ለነድአየ ልእኮት፡ "ናይ እቅትሳድ ወተጠውር መትቀዳም ጅምሁርየት ትርክ ዲብ ሐንቱ ማርሒትክ እብ ሰፊት ክምሰል ትተላሌ ዳምን እነ" ሐቀለ ቤል፡ እሊ እግል ሓድረት ናይ ክልኢቱ ዕላቃት ወመትሰዳዳይ ኤረትርዮ ወትርክ ክምሰል ደፊዕ ሸርሐ።

እበ መናሰበት ህዩ ርእሰ ኢሰያስ፡ እግል ርእሰ ጠይብ ኦርዶጋን ታመት ዓፍየት ወእግል ሽዑብ ወሕኩመት ትርክ ህዩ ሰላም ወመትቀዳም ተምነ።

ምጅልስ አቅሊም ጋሽ-በርክ፡ ናይ ሰነት ርቱብ እጅትምዑ ሰርግል

ምጅልስ አቅሊም ጋሽ-በርክ፡ "እብ ፋይሐት መሻረከት ገበል እግል ዐምር ንትዐንደቅ" እት ሐንቲለ ትብል ስቅራት፡ ዮም 28 ማዕ ዕልብ 20 ሰነት ርቱብ እጅትምዑ ዲብ መዲነት ባረንቶ ሰርገለ።

ርእሰ ምጅልስ አሰይድ ዑስማን መሐመድ-ዐሊ እትለ ሀበዩ ሸፊሕ፡ መናሰበት ለራሕበ ክፋል መጅተመዕ ዲብ ሐርስ ወርዕዮ ለተንከበ ሰበት ቱ፡ ቀደም ሐን ሐርስ ለገብእ መዳለት ለበዝሐ እንክር ቅብለት ናይለ አቅሊም ካፍየት ዝላም ሰበት ኢረክብ ሕሰር እግል ልትህየቡ፡ ዲብ ሐየቦት ደራይብ እንሱሰ ወሐርስ-ብሩር ለህለ ድዕፍ እግል ልትሓየስ ህዩ፡ ኣንፋር ምጅልስ እብ ፈዛዕት እግል ልሸቀው ክምቱ ሐበረ።

እተ አቅሊም ለህለ ከደማት መዋሰላት ሐራት ዲብ ሕዱድ ክጡዋ

ለትከለበ ሰበት ቱ፡ ለከደማት ለልትወሳዕ እቡ መጃል እግል ልትከለቅ ሐቀለ ተሐሰቤ፡ ወጀዶት ወመትካፊያት ኪዳማት እጅትማዕየት፡ መሻረከት ሽዑብ ዲብ በራምጅ ዐማር ለረከዘ ተውዴሕ ሐቀለ ሀቡ ዶር ኣንፋር ምጅልስ ዲብ በራምጅ አትፋዝየት እግል ልትወቀል ትፋነ።

ኣንፋር ምጅልስ ደግሞ ለትሸቀ በራምጅ እብለ ከሰበ እብ መስኢሊን አቅላም ለቀርበ ተቃሪር ሐቀለ ወደዉ ህድግ፡ ገበዩ ጽብጠት ፊራሮ ፍድኢት-እንሱሰ አትሓየስ እግል ልግባእ ዲቡ፡ ሰሪት ዕጩይ አሰል እግል ልትከራዕ እብ ሕሰር እግል ልትከደም፡ ዲብ ለአሰሐብብ መጽእ ለህለ ዐንበጠ-ዕጩይ ሕሰር እግል ልትህየቡ፡ ዝዙም አትመቃርሐት ትራክተራት እግል ልትኣከድ፡ ሐራይ-ዘርእ እት ዶሉ እግል ልዓሌ፡ ደራይብ

አብያት ወመኣሰሳት ዲብ ወቅቱ እግል ልትጀመሩ እጃዘት ዝበ ዕጩይ፡ ከዕሌ ወእንታጃ፡ ገበዩ ጽብጠቱ እግል ትትፈረግ ለልብል ወበዕድ አራእ ወኣፍካር ቀደመው።

ሓክም አቅሊም ጋሽ-በርክ ሰፊር መሕመድ ዐሊ ሐራይ እትለ አሰመዐየ ናይ መከለሲ ከሊመት፡ እብ ኣንፋር ምጅልስ ለትቀደመ ኣፍካር እግል ፈዓልየት በራምጅ ዐማር ምህም ክምቱ እንዴ ሸርሐ፡ መዓወነት ኣንፋር ምጅልስ ወእዳራት ወመሻቂትን እግል ትደቀብ ሐቀለ አትፋቀድ፡ እብ ደረጃት አቅሊም አውለውየት ለልትህየቡ ወራታት ሕፍዘት ማይ ወትርበት፡ ረዘቀት እንሱሰ ወእንታጃ፡ ሀወኖት ሰሪት ዕጩይ ወሸቲል ዕጩይ እህትማም እግል ልትህየቡ፡ ዶር ኣንፋር ምጅልስ ምህም ክምቱ ወድሐ።

ዝክረት 60 ሰነት ተጽሏል እተሓድረ አፍሪቃ፡ ዲብ አስመራ ትገብእ

25 ማየ - አምዕል አፍሪቃ ወ 60 ሰነት ዝክረት መትሓሳስ እተሓድረ
አፍሪቃ፡ እት የም 26 ማየ ዲብ ሆቴል አስመራ ፓላስ ትዝከረት።

ዲብለ ውዝራእ ለልትረከቦ ዲቦም ውቁላም ሰብ-ሰልጠት ሕክ-መት
ወጅብሆት፡ ዲብ ኤሪትሪያ ለአካኖም ሱፊራእ ወዲፕሎማሲኤን ለሐድረው
ዲቡ በርናምጅ፡ ወዚር ካርጅየት አሰይድ ዑሰማን ሳልሕ እተ አስመዐየ
ከሊመት፡ አምዕል አፍሪቃ እት 32ይት ሰነት ዲድ ሕርየት ሰበት ተዐየደት፡
ዝያድ ገማል ክምበ ሸርሐ።



አፍሪቃ እብ ግርመት ምድረ ምን ገብእ ውብዝሐ ኣርዛቀ ምንላ ብዕድ
ከፊፍል ዐለም ፍንቲት ክምተ ለሸርሐ ወዚር ዑሰማን፡ የም እግለ ብዝሐ
ወለለአትፊክር ህያብ ዐየዶቱ ሐበን ክምቱ አብረህ።

ለብናቱ ኣርዛቀ ሐሊትን እግል ልግበእ ዲብ ወጅቡ፡ መስተዕምረት
እት ሰነት 1884 እግል ቃረትን አፍሪቃ እንዴ ትካፈለወ እት ሐንቴሆም
ጀላብ እግል ሊደወ እበ ትትወጤ እግሎም፡ ዲብ ቀባይል ወጅንሰ እንዴ
አተንከበው ሕዱድ ድወል ክም ረስመው ለሐበረ ወዚር ዑሰማን፡ ውላድ
አፍሪቃ ዲብ ሐን እስትዕማር ለሓለፈወ ለዐቤት ዐዛብ ናይ ገብር እንዴ
ኢገብእ፡ ማሕበራይ ሰዋልፎም እንዴ አክረበው ወእዳራት-ከርስ እንዴ
ደመረው ለተለ መእከይ ክምቱ ወደሐ።

አፍሪቃ ለደመረ ሐርብ ናይ-ከርሱ፡ ሐርብ ቀባይል፡ ሐርብ ሕዱድ፡
ከራብ ወኢሰፋየት እዳረት፡ ለአግደ ሰበብ አሳር መስተዕምረት እግል
አትመዋት ካልአይ-ሐርብ ዐለም እንዴ ተለ ለመጽአ ሐዲስ ንዝም ዐለም
ክምቱ ሸርሐ።

ወዚር ዑሰማን እንዴ አትሉ፡ የም ለባሊ ንዝም እዲን እት ቀደሚኑ
ልትሃተክ ሰበት ህሉ፡ ዶርን ክም ውላድ አፍሪቃ፡ እንዴ ትገሰን ለመጽእ
ንዝም እዲን እግል መንፈዐትን እግል ልግባእ እብ ሰእየት መትጸባር እንዴ
ኢገብእ፡ ዲብለ ተቅዩር ፋዝም መሻርከት እንዴ ገብአን፡ ሐዳስ ሰልጠት-
አፍሪቃ እግል ንብኔ ወእግል ዐማር ድወልን ለናሱብ መጃል እግል ነአዋፍሕ
ክም ወጅብ አፍሀመ።

ዲብ ደንገበ ወዚር ዑሰማን፡ “ስቅራትን ሩእየት እተሓድረ አፍሪቃ - እብ
ተጠውር ወሰላም እግል ለሐሰት አፍሪቃ ወለሐሰት ዐለም እግል ልግባእ
ቡ” ሐቆለ ቤሉ፡ እሊ ህይ ዲብ መቅጠነ ለተንክበ እግል ልግባእ ክም ወጅብ
አተምበህ።

ዲድ ሕርየት ኤሪትሪያ፡ ዲብ ለትፈናተየ ድወል ተዐየደ

32ይ ዲድ ሕርየት፡ “ምስተንክር
ሄራር ሰባተት” እበ ትብል ሰቅራት
ዲብ ስቶክሆልም ሸዌደን ዲብ የም
27 ማየ እብ ነያረት ተዐየደ።

ዲብለ እብ አላፍ ለልትዐለቦ
ምዋዋኒን ለሻረከው እቱ ዲድ፡
መስኡል ሸኡን ሰፋረት ኤሪትሪያ
ዲብ ድወል ስካንድኔቭየ አሰይድ
የናስ ማን ዲብ ቀደመየ ከሊመት፡
ለጋምል ዲድ፡ ፍሬ ስሙድ ዲብ
መብደእ ወመዳፈዐት ትርድት
ክምሰልቱ እት ሸፊሕ፡ “ሐምዴ
እግል ሸዐብ ወሕኩመት ኤሪትሪያ
ወፍራስ ቅዋት ድፍዖም ትግበእ”
ቤሉ።

እንዴ አትለ አሰይድ የናሱ፡
ሸዐብን ክምሰለ ውሕደቱ እንዴ
አደቀበ ወእት ዎር ሰፍ እንዴ በዋረ
እብ ሲድየት ለገርገረው ዌረት
እንዴ ጋብህ ለትዐወተ፡ እት ዐማር
ወብንዩትመ፡ ካልእ ምስተንክር
ክም ሸቄ ለለአትሸክክ ክም ኢኮን
ወደሐ።

ርኢስ መዳልያይት ልጅነት
ዓያድ ወጠን አሰይድ አለም
ተኸሌገርጊስ እብ ጀሀቱ፡ ፍንቲት
ዲድ የም ዓመት እበ ከስስ ዲብ
ሰነት 2023 እብ ንቃዋ ውቁል



ሀሚልተን፡ ረጃይን፡ ወኣንታርዮ
ለነብር ኤሪትሪያን፡ “ምስተንክር፡
ሄራር ሰባተት” እት ሐንቴለ ትብል
ስቅራት፡ ዲድ 32ይት ሰነት ሕርየት
እብ ነያረት ዐየደው።

ዲብ ምን የም 19 አስክ 26
ማየ ለገብእ እሕትፋላት ጃልያትን
ዲብ ክዌት፡ መስኡል ሸኡን ሰፋረት
ኤሪትሪያ አሰይድ ሐመድ የሕየ
ሓሊ፡ ርኢስ ጃልየት አሰይድ ሳልም፡
ቁንሰል ዓም ሰፋረት ኤሪትሪያ
ዲብ ጀርመን አሰይድ ክብረአብ
ተከሰቱ፡ መስኡል ቁንሰልየት
ኤሪትሪያ ዲብ ከናደ- ወመስኡል

ወቅዋት ድፊዕ “አሰናይን” ዲብ
ልብሎ፡ አምዕል ሕርየትን ዝያድ ኩሉ
ዓያድን ለነሐሸመ፡ እብ እስትሸሃድ
ቃሊ ለትረከበት ወዋይዲባት
ድቁባም ለአድነት አምዕል ምን
ገብአት ክም ቱ አከደው።

ህቶም እንዴ አትለው፡ ናይ
የም ዓመት ዲድ ሕርየትን ፍንቲይ
ለወድዩ ጋር፡ እት መርሐለት ሐዳስ
ናይ ዐማር እተ ንትዐዴ ዲብ ለህሌን
ተየልል ሰአየት፡ ክምሰልሁመ
ከይናት መሐልከት ላቶም ጀሃት
ወድወል እት ልትፋደሕ ወዕላቃትን
ምሰለ እት ወቀይ ዐማርን እግል
ልሰርግለን ለቀድር ድወል እት
ትትጠወር ትመጽእ ዲብ ለህሌት
አዋይን ልትዐየድ እብ ሀለዮቱ ክም
ቱ ወደሐው።

እሊ ክእነ ዲብ እንቱ፡ እት ጃዛን፡
ኸሚስ-ምሼት፡ አነማስ ወተኑማ
ለነብር ኤሪትሪያን እት ነዘመወ
ሐፍላት 32ይ ዲድ ሕርየት፡ ቁንሰል
ዓም ደውለት ኤሪትሪያ ዲብ ጅደ
አሰይድ ዑብዱራሕማን ዑሰማን
ወመስኡል ሸኡን ጃልያት ወሸዐብ
አሰይድ መሐመድ ዐሊ መሐመድ
ሰዒድ ለሐድሮ ዲብ ህለው፡ እተ
ዲብ ከረ ጀርመን ክዌት፡ ቀጠር
ወከናደ ለገብእ እሕትፋላትመ
ለትፈናተው መስኡሊን ወፊተኛ
ኤሪትሪያ ላቶም ዲፕሎማሲኤን
ወመዋዋኒንል ድወል ሓድራም
ዐለው።

32ይ ዲድ ሕርየት ኤሪትሪያ
ዲብ ካርጅ፡ እብ ጃላያትን
ለነዘመያሁ በራምጅ ርያደት፡ ዓዳት፡
ዕፌ ሄራር ዐማር፡ ሰቂል መንዴረት፡



እግል ትደሐረው ናይ 2ይት
ደረጃት ምህርሆም ለአትመመው
ደረሰ ወዋልዴኖም “አሰናይ”
እት ልብል፡ መትድሕረት ናይለ
ከስበወ አምር ወምህነት፡ ዲብ
መዓል ሸዐቦም ወደውለቶም እግል
ለአውዕሎ ትፋነዮም።

እተ መናሰበት፡ ዓደት
መድሐራት እብ ማስተር ወብዕድ
ደረጃት ምህርሆም ለአትመመው
ደረሰ ገብአት። ለዒድ፡ ምን ክለ
ሸዌደን ለትወከለው መሲቅዩን
ወፊናኔን እበ ቀደመወ ዕፌ ዓዳት
ጋምል ዐለ።

32ይ ዲድ ሕርየት ኤሪትሪያ፡
ምን የም 13 ማየ አስክ 3 ጁን
ዲብ ዝያድ 64 መዳይን ድወል
ስካንዲኔቭየ ልትዐየድ ክም ህሉ፡
ምን አካን ለበጽሐተን ሐብሬ
አትአመረት።

እምበልሁመ እት ክዌት፡ ቀጠር፡
ሊብዩ፡ ሰዑድዩ፡ ጀርመን- መዳይን
ከለን፡ ዱዝልዶርፍ፡ ቱቢንገን፡
ሸቱትጋርት፡ ፍራንክፊርት
ወድዋረን፡ ሳሕል አልዓጅ፡ ከናደ
- መዳይን ቶሮንቶ፡ አታዋ፡
ቫንኩቨር፡ ካልጋራ፡ ኤድመንተን

ቀድያት መጅተማዕ አሰይድ
እስጢፋኖስ ንጉሴ፡ ሰፊር ኤሪትሪያ
ዲብ ደውለት ቀጠር አሰይድ
ዐሊ እብራሂም፡ መስኡል ጃልየት
ኤርትሪያን እት ቀጠር አሰይድ
ረሺድ ያሲን፡ መስኡል ልጅነት
ዓያድ ዲብ ቀጠር አሰይድ ጣህር
መሐመድ አረይ፡ መስኡል ሸኡን
ጃልየትን ዲብ ርያድ ወድዋረ



አሰይድ ዑብዱራሕማን ኢማም፡
ወንምያይ ሸኡን ሰፋረት ኤሪትሪያ
ዲብ ሰዑድዩ አሰይድ ወልዴሰላሴ
ገብረመድህን፡ ዲብ አስመዐወ
ከሊማት ልእከት አምዕል ሕርየት፡
እግል ሸዐብ፡ ሕክ-መት ኤሪትሪያ

ደረሰ ወሸባብለ ጃልያት ኖሶም፡
ክምሰልሁመ ምን እንሰር ለጌሰት
ፍርቀት ዓዳት ወብዕድ ነያረት
ለልሀይብ በራምጅ ጋምል ክም ዐለ፡
ምን ክል አካን ለበጽሐተን ሐብሬ
ተአክድ።

ሄረትሪያዕጃዳክ

ክል አርቡዕ ለትጠ'በዕ ጀሪደት

መዳልያይ፡
መሐመድ እድሪስ

ለይአውት ወአርተዖት
* ዘህረ ዐሊ
* ፋዋነ አድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

አትአመሮት፡
ተለፎን፡ 125013፡ ዕ.ሰ.ቡ፡ 1284

4^ይ ወናይ ደንጎበ ክፈል

ሕርየት ገብይ ረጅም ወውል ቃል

ሕርየት እብ በህለለት ወቅረዲት ኢኮን ለትረከበት። ዝያድ 65 አልፍ መናድሊን ኤረትርየ ጀላብ ሕርየት ወእስትቅላል አርወሐቶም ቤዘ እንዴ ወደው ቶም ሕርየት ለረከበው። በርዱ ክቡድ እስትሸሃድ ለትደፈዐ እግለ ሕርየት ትርድት ዓቅቢት ክምሰል ትሓይመ እኩድ ዐለ። እብለ ህዩ ለሐቆ ግም ሕርየት ለዐለ ግም እግል ዐማረ ወዴቅቢት ህቱመ ሞራሁ እት ልትማጤ ትረክ። ኣዜመ ለካይን እብ ሓሰድ ደሚር ሰበት ትወራብበ እግል ዘማቱ ወራር አሰር ወራር አትፈረረ። መቃብሉ ክቡድ እስትሸሃድ ትደፍዐ። ሕበር ገብአት ለግንዳሌ። ክሉ ለመራሕል ላኪን እስትሸሃድ ጠልብ ዐለ። እስትሸሃድ አርወሐት ዝያድ 20 አልፍ ሸሂድ ወሸሂደት።

ምን ክሉ ዕምርክ እት ናይክ መሰለሐት እግል ተአውዕሉ ለልትገበአክ እት ጀላብ ሕርየት እምበል ማል ወውላድ ፈኑ ለሐልፍ ዐለ ወህለ። ኣቤ! አማም እለ ሰራጊት ዐድነ ለእዲሁ ኢልህብ ወእብ ቅራሩ ለኢልአስተሰልም። እት ክል ኢኮት እራደቱ ወሕርየቱ እግል ልሰልም ወደማነ ነፍሱ እግል ልሕገል። ድራክ ወአትፋርሆት ለአበዝሐ እቱ ዐለው ወህለው። እሊ ክሉ ቃሊ ተበን እንዴ ደፈዐክ ከእራደትክ እግል ብዕዳም ሐቆ ሰለምክ ሕርየት ሚ መዐነት እግል ተህሌ እግለ!? ተርጀመተ ሸቅል ቤረግ ወመትገላይ እት ሐን ረሐመት ዌረት ሌጠ ትገብእ።

አይወ! ሕርየት እለ ቀላል ዘዐተ ወፈዳቢት ተርጀመተ ወመዐነተ።

ኣቤ! ሕርየት! ጽንዕተ የሀው ኢኮን በህለለት።

እባቱ ኢኮን ለእብ ልብነ ወዕነ ተዐቀበት።

ወእባቱ ኢኮን ለክለ ሐያትነ እግለ ትሰበለት።
ሕነ ሸዕብ ኤረትርየ ሕርየትነ ቀላል ኢኮን ወእብ ቀሊል ኢትረከበት።
ምን ደምነ ረዌት ወእንጎሶን

ትሓሰሰት ወእብ ዓጭሞታትነ ትከለበት።
ነፍሱን እግል ሕርየት ፍዘ ገብአት ሕጽን ኢትቤ ወወለት።

የሀው!!! እለ አርደት አበነተ ወዕጩተ ደብረ ወቀላቅለ ዐደቀ ወሳሰተ እግል ፋቀዶቶ ተእሪክ ወሸሂድ ኒዴ እተ አልፋትሐ።

ክሉ ረቢ ለካልቁ መክሉቅ እትለ ሐያት ልተምኔ ወልትሸነህ፡ ሕልሙ ወሸንሂቱ እግል ልብጸሕ ወለሐቅቅ ላኪን አርደት ጣፍሐት ተአትሐዝዩ። ሕናመ አማም ኤረትርየ ክምሰል አዳምነ ሕልምነ ወትምኔትነ እግል እብ ሰኔት ንብጸሕ እብ ደሚር ሰላም ወአማን እት ንትበገሱ። እበ እብ እንክር ገለብነ ትሐቀበትነ መክረሀት ግዋሬ ክል ዶል ደሚርነ ልትሐምረግ ወትምኔትነመ ተአቀልዕ ዐለት ወህሌት። ረቢ ካርዐ ልግበእ ለሓለት እለ፡ “በዐል ሱእ ግዋረ ሼለቢ ገዐዞ ምነ። ወበዐል ሱእ ግዋረ ዳምር ወአምርክ እግል ኢትትመረሕ።



ዐውዞ ምን” ብህለቱ ኣነቢ ዐለይሁ አሰላቱ ወሰላም። ኣዜመ “ያረቢ ሸርም ኢትአብጸሐነ ግድም ከፊኑ” እግል ኒበል እንዴ ኢኮን እት ብክሉሕ ደማር፡ ወልብ ካይን ወጤልማይ፡ ለትጸግዐ ላቱ እግል ዲመ እት ለሓኪ ነብር። ለምመላተ ጸብጠትነ ለህሌት። ክል ፈጅር



ወቅሎዕ እሰሶሕ እግል ሕር ቀራር ወታምም ኤታን እት ንትፈረር፡ እበ ካይን ውዳዮም ለዐንቅፋነ ከፍንጌነ ወፍንጌ ሸንሂትነ ለአዳብጦ።
ኣቤ፡ ክምሰል እለ እግለ እብል ለህሌትነ። ምን ለሀበትክ እግል ኢትትደረር ወእብ ፍክርክ ወአምርክ እግል ኢትትመረሕ።

እለ አርደት ከም ወከም እግል ኒበል ወንዕደድ ገብእ? ምን ተአውሕድ ምን ለሀበትነ፡ ወምን ተአበዝሕ ምን አርወሐትነ፡ ህተ ለነሰአቱ ሚ ዶል ሑድ ገበአ! ምድረ ወበሐረ ምን ደምነ ወለሀበትነ ክምሰል ሐዜት ነሰአት

ሕሩይ ወቅዱይ። ኮንዶእ? እት ሞዳየ ህለ መሰለኒ ለምሰል ከልቀትነ ምሱኑይ!! በዲር አበው አስተሸሀደው እግለ ለምን አፈች ዌረት እግል ለሕርየት ነዘዐ ወአተክረው። ወኣዜ እብነ ዐረ ለመአከይ፡ ላኪን ዋርሳይ ዮምመ ክመ እት ማሌ ሰይፍ አቡሁ ወአብዕቡ እንዴ ጸረ ካፈሐ እግለ ወካፍሕ እግል ህለ።

ለአማን ህተ ዲብ እንተ ክምሰል መሰል ትብለ፡ “መሐምርጋይ እት ህለ ማይ ጭሩይ ኢልትሰቱ” ሓሰደት ግዋሬ ሕቅብትነ እት እንተ እብ ሰላም እግል ልንበር አብዕቦታትነ ወአቦታትነ በክት ኢወደው። ላመ ኤረትርየ ለልትበህል ሞዳይ ብቡቱ ኢሰኔት። ላመ እተ ወክድ ለሀይ እብ ከይራት ወፈርያት ሀወል ትወዴ ለዐለት ጠቢዐት ወለብሩድ ሸማለ ወለ ቅዱይ ውልዋለ ጸነ ባርት ወሰምዕ መአከይ እግል ልግበእ ትቀሰቤ። ምን ሰልፍ ተብጊሰት ገጽ እብ ገጽ ልግበእ ወለ እብ ሸፍትነት ሰላመ ወሓለት ጠቢዐተ እት ሐቱ ኢኮት ቀየረው።

አይወ፡ ሕርየትነ ላኪን እላተ ሐቆ ቃሊ ተበን ወሄራር ረዩም፡ ምን መግዘም ዌረት ወምን አቀይድ ምስትዐምረት እንዴ ትባልሐት ወትፈትሐት ከአፍያት ዓረት ወእት ሸማል ሞዳየ አወልወለት። ሕርየት ሄራረ ሰዱድ ወዐውለ ምዱድ፡ ምን ገብእ ለዐሬ እቡ? ሕናመ እብ ፈድል እሊ ፍራሰ ገቢል ክምሰል ምራድኪ ንስኢ ወትሸንሂ እንብለ።

ሐቆ ህተ ይህሌት ሸንን አለብነ ወማንዳሌ።
እት ገርብነ ህሌት ሸንርብ ክሌሕ ወሕላሌ።
ለቃሊ ዐውለ ነአምር ወለ እግለ ካተርነ ገበይ ረጅም።
ዲመ ትንበር ወትህሌ ሕርየትነ!!
ዐውል ደምና ተ ወአርወሐትነ!!

ፍንጌክ ወፍንጌ እራደትክ ወለ ታመት ወቃልየት ሕርየትክ ውሻል ሱእ ገብእ እግልከ።

ሕነ ላኪን ሑዳት ህለየ እግለን ለነአምር። አማን፡ ደማንት ነፍሰ ወሰቡል ሻብ። እብ ፈድላ እለን ሰልአስ እንሳይር ህሌነ ወእነብር። አማን እለ ሕድት ዘዐት ወሐሬ እት አማን ለትጨሬ። ወደማነት ነፍሰ ለመስል ዋላዊል ወሰረፋሪፍ ለኢትትገሌ። እግል ሕርየተ ትትጋደብ ወእብ ቀራር አርወሐተ ትሐክም ወትፈርድ እት ሳብት መብደእ ለእርትግዝት ሳብተት ኤርትርያይት እራደት ወሀውየት። እሊ ሰቡል ሻብ ወሻብት ለእግል ሕሸመት አርደቶም ቤዛህ ለገብእ እግሎም ምንዲ አለብክ፡ ኮንዶእ ለእግለ ወገብእነ!” እምበሌሆም ምን ህለ ገብእ፡ ኣዜ መጦርነ ለበዋር ወምቀደምነ ለለሐዋር።

ወትሸንህት እቱ። ዐዛብ ወክርበት እብ አሰባብ ሓሰደት ግዋሬ መለሀይነ ገብአየ። እት ጀላብ ሕርየት ወሰያደት እግል ክሉ መቅጠን ወዴነ። ምስል ክል ሰድት ወክርበት ምስለን እግል ንትመሳኔ ትቀሰብነ ወትጀበርነ። ውሉድ ምን ገጽ ዋልዴት ትሐረመ። ዋልዳይ ዐነት ውላዱ ጸብረ። ክሉ እብ ሰፈላል ወአኖካይ አግቡይ ዐቅብ ወአፍቀ። እትሊ ክሉ እሊ ለካረ ላኪን ሻም እለ አርደት ቱ እግል ለአምር ለትሰአለ። በዲር አብዕቦታትነ ወአቦታትነ ትፋነው እቤ ለኣታቦም እተ ትቀረጩ ወለሻመ እት አሰራር ደሞም ተሓበረ።

አማንቱ፡ ፍቲ እለ ወጠን እት ትርበተ ገብእ ትከለቀት? ወለ እተ ማየ ለጭሩይ? ወለ እት ሸማለ ህለ ለእግል ተአተንፍሱ





ምን ሽዑብ ወንዳል ኤረትሮፕ ወኬሌ መደርሰ ኢህላ

መዳልያይ፡ ጥዑምዝ ተሰፋይ ተርጀመት፡ ሳልሕ ገመ

እትለ እዲነ ደያነት ምን ኬን ናይ ብሕቶት እምነት ክም አግደ መጥፍሒ ሰልጠት ወተርጀሞት ሀደፍ ስያሰት ለገብእት እቲ ዘበን ትርኡ። እንትሃዝ ስያሰየት ዲብ ደያነት ዮመ ምን ገብእ እብ ዋይዲባት እንዲ ተሐባለክ ሰኔት ለልሐሚ እት ልትመሰል። ዲብ ለትፈናተ ርክን ዐለምን እሳት እት ለአትሳውር ልትርኤ።

ክል ምዕል ክመ እንሰምዑ እብ ምስምሰ ደያነት ለትበገሰ ቅታል አራዊሕ ወዘማቲ መዋዋኒን፡ ሰበቡ እት ፍንጌ ቴልየት ደያነት እንዲ ኢገብኤ። እት ፍንጌላ ምን ኬን ስታር እንዲ ገብአው ለልአትሳውር፡ እብ ፈነ ወአሰረቶት ውላድ አዳም ዲብ ሰልጠት መሳልሐም እንዲ ገብአው እግል ልንበር ለልሐዘቱ ለገብኤ።

ሀደፍ ስያሰት ለመበገሲሁ ናይ ደያነት ዐዳዋት፡ በዲር ምን ገብእ ወዮም ለበዝሐ እትጅሃት እዲነ ሻምሉ ህለ ምንመ ልትበህል አትራዛቅ ኢኮን። ምን ቀዳሞም ለፈህመዉ ወለፈዘወው እሉ አካን ከልኡወ እት ህለው፡ ለእግሉ ወለመሰል መሻክል ለኢልፍህዋ ሳኪን ሰብ ደም እንዲ ገብአው ዲብ ዐዳወት ነብሮ ህለው።

እት ታሪክ ዐለምን ደያነት ክም መሻቀዩ ስያሰት ውላድ ካርጅ ለገብእ እቲ ወክድ ዐለ ምንመ ልትበህል ሐድሮ ሌጣቱ። እሉም ምን እሊ ኬልም ናይ ውሕደት ክላፍ እግል ልድሐኖ ለቀድሮ ህዩ ፈዛዐት እንዲ ተዐንደቀው ለጸንሶ ሌጣቶም።

ኤረትሮፕ ሐቲ ምንለ እብ እስትዕማር ወአዝናቡ እብ ናይ ደያነት መትፈናታይ እግል ትትረበሽ ወውሕደት እንዲ ትፈርተክት እዲህ እግል ተህብ ለትሐፊት ደውለት ክም ዐለት ወህሌት እትሊ ናይ ቅሩብ ታሪክ እግል ንርአዩ እንቀድር። እንዲ ኢነአረይም ንዝም ንጉሰ ህይሌሰላሴ ወመአይደቱ፡ ሽዑብ ኤረትሮፕ እት ሐንቲ እስትዕማርም እግል ለአቲ መጦርላ ናይ ዲሽ ወጽዋር ቅወት፡ ናይ ደያነት ዐዳወት ዲብ አቅርሖት እንዲ ተዐንደቀው ሸቀው።


እት ፍንጌ ሙእምኒን ደያነት ክስታን ወእሰላም እበ ለአሳወረ ለዐለው ዐዳወት፡ አሰክ ወክድ ሕርየት እበ እንዲ ከልቀው አድሕድ ዲብ ዘምቶ ወቀትሉ ለነብረው ክፋል ሽዑብ ኤረትሮፕ ክም ዐለው ልትአመር።

ፈዛዐት ዲብ ትውሕድ ዲብ ወክድ፡ ደያነት አግደ ሰበብ ዐዳወት ሽዑብ እግል ትግበእ ለልአቀድር ክምቱ ለልአምሮ ቅዋት ወአፍራድ፡ እሊ ዲብ አንተሃዝ እት ልትሳወው ልትረአው። ንዝም ደርግ'መ ሰባተት ሰውረት ኤረትሮፕ ለኢትተምተም ሰበት ረአዩ እብ ደያነት አሸዋኩ እግል ልዝረእ ውላድ አውለት ወቀላቅል “ቀለማው እና ደጋማው” እት ልብል ጅሩብ ዐለ።

ታሪክ ግድለ ሰለሕ ሽዑብ ኤረትሮፕ ፈድል ውሕደቱ ወመተራዱ፡ ክቡድ ንዳል እግል ልትዐዲ ለትጠለበ ምኑ ወእግለ ሰብ ፍንጌር ለተክለው ከይናት እግል ልምሖ ትሩድ መካይድ ነስኦ ምኑ። ዲብ ብጋሰት ግድለ ሰለሕ ሽዑብ ኤረትሮፕ፡ እሊ ተእሲር እሊ አሰሩ ሰበት ጸንሐ፡ ሰውረት ኤረትሮፕ እብሊ መሻክል እሊ እት ትትረበሽ እብ

እግል ትግበእ ቀድረት። እሊ ህዩ እሊ አፍካር ወዋይዲባት ስሙም እንዲ ፈረገት ሰበት ሓረበቱ ቱ። ዲብ መደት ንዳል እዲነ እብ ናይ ደያነት ዐዳዋት እት ትትበጭብጭ፡ እብ መስተዕምረት ቅዋት ለልትሳወር ናይ ደያነት አክይ መቅሬሕ እት ለትወቀለ ደረጃቱ እተ ለዐርገ ዲብ፡ ጅብህት ሽዑብየት እግል ክሉ ድንገር አፍካር ምን ወጠን ለፊመ፡ አካን ለትክልእ ወእግል ሐዝዩት ሕርየት ወወጠን እግል ትብኔ ለሓለፈቱ መእከይ “እብ ድግማን ረቢ ኢለኦርኤናቱ” ለልአተብል ቱ። ምን እብ ሰለሕ ለወዳቱ ብዘሕ ደም ለፈሽለ ዲብ ሐርብ ወኬን፡ ፈዛዐት መዋዋኒን እግል ጠወርት ለሓለፈቱ ንዳል ክብድ። ሰበቡ አሳሰ ናይ ዐውቱ ውሕደት ወፍቲ ወጠን ሰበት ቱ።

ጀብህት ሽዑብየት ቢያን እብ ዐመል ለሸቁ ናስሓም መናድሊን አፍሬት።



ውሕደት ወጠን ለልሐሰሶ ሐዝዩት ሕርየት እግል ፈረገት አሰክ ልትቀደር ጨቢብ አፍካር ለአምጽአዩ ክቡድ መሻክል ክም ዐለ ታሪክ ለልሸህዱቱ።

ጀብህት ሽዑብየት ምን እሊ ለመሰል ንዳል ለትክለቀት ቅወት ሰበት ዐለት ህዩ እግል ድንገር አፍካር እንዲ ጄቀቀት ናይ ሕርየት ቅወት

እት ዕባደት ለልውዕል ወለልትመዩ መናድል ኢዐለ። ሙናድል ጀብህት ሽዑብየት ጀላብ ግዱዓም ገባይሉ ዲብ ናይ ክል አምዕል ሐርብ እንዲ ትጽመደ ለልአስተሸህድ ወለልትሰዩፍ ቱ ለዐለ ድኢኮን፡ ክመ እት አምዕላይት ዕባደት ወሰላት እንዲ ህለው ዕስያን ለወዱ ጀሃት ኢዐለ። ዲብ ክል መሳግድ ወክናይሰ ዲብ ለዐብድ ሰኔት ለልተምኔ ኢዐለ። እግል ለገብእ ልግበእ ተዋልል፡ በደለ ለአለበ አርወሐቱ እንዲ መልክ ጀላብ ሽዑብ እት ለአስተሸህድቱ ለሐልፍ ለዐለ። ወእብሊ ደም ወአርዋሕ እት ለህይብቱ ውሕደት ወጠን ወሕርየት ለአድመነ።

ክሉ ሄራሩ፡ አርወሐቱ እት ለህይብ ዲብ ቱ ለሄርሩ ለዐለ። “ዐውቱ እግል ገቢል!” እት ልብል ረሕመት አድሕድ እንዲ ትካፈለ ሕድት ክም ብዝሕት እበ ለትአነብር ፈዛዐት ባኒ ለዐለ። ወድ ደያነቹ፡ ወድ ቆምዮቹ ወወድ



ዐጃ ለልብል ወክድ እንዲ ሐልፈ፡ እስትዕማር ለልአትናይት ግያሰ ሰበት ፈህመዩ ድዱ እግል ልትበገሰ ወሽዑብ ለልፍህም እበ ገበይ እግል ልብኔ ቀድረ። ሂጋሁ ዐጃ፡ ሽዑብዩ፡ ሕርየቹ ... ሌጠ ዐለት። እሊ ምን ኢገብኤ ክመ ክል አምዕላይ ለእንሰምዑ ክበር፡ ክበር ኤረትሮፕመ፡ ክበር ክላፋት ወመትሻዕታር፡ ሞት ወደማር ወገብኡ። ሰብ ፍንጌር እበ እኩይ ወድንገር አፍካር ዐዳወት እግል ለአሳውሮ ሐቆ ቀድረው፡ እግል ዲመ እግል ለስተዕምሮ ወእግል ልዝመቶ ክም ቀድሮ ሰኒ ወአማን ሰበት ለአምር፡ ታሪክ እሊ እዲናመ ሰበት አድረሰዮም፡ አግደ ጽዋሮም እግል ሊደዉ ምን ጀረቦት ሳክላም ኢለአምር። እብ ሰበብ እሊ ህዩ ብዘሕ ሽዑብ እዲነ አክይ-ግባእ ናይዩ ጋብእ ህለ። ዲብ ኤረትሮፕ ሳኪን ፈድለ ዲብ መእከይ ፍንጌር እንዲ ናደለ ለዐበ ንዳል ወሳብት ሽዑብ ሸህህት ሰብ ፍንጌር እንዲ ኢትዐግብ ቱ ለትግልጸጸት። እት ደንገበ ህዩ ሰከት ሕርየት ህተ ሌጠ ክም ዐለት አከደ።


ጀላብ ወጠን ወሽዑብ፡ ጀላብ እስትቅላል ወሕርየት፡ እስሌማዩ ወክሰቱናዩ ዲብ ምርት ሀደፍ እብ አሮ መርበይ ሰበት ሄረረ፡ እት ትርድት ንዩት ወውሕደት ዕድዋት እግል ልደምር ቀድረ። ክእኒ ለመሰል መሰባል፡ እግል ሽዑብ ኤረትሮፕ እብ ቀላለ ለኢልትረከብ ህያብ ገብእ እት ህለ፡ እግል ሐዝዩት ፈንጨጋር ህዩ መውዲ ቀጠን ቱ።

እትሊ ወክድ እሊ ደያነት ሐቲ ምስል ብዕድ ደያነት፡ ሐቲመ ደያነት እግል ኖሰ ብዘሕ አፍረዐት እት ወሰኩ ዲብ፡ ሽዑብ ብዘሕ ድወል ዲብ መትሓራብ ለህለ ዲብ ወክድ፡ ሽዑብ ኤረትሮፕ ዲብ ዕዛል ሕርየቱ እንዲ አተሐደ እግል ልንበር ለቀድር ሽዑብ ክምቱ እኩድ ህለ። ግድለ ኤረትሮፕ ልሳዕ እተ ከደን ወመላል መረር መንበር እት ህለ፡ እግል ክሉ ትፍል እንዲ ነሐ ገበይ ውሕደት ወጠን እንዲ አዋራሕ እብ ሕርየት ዐድ ለአተ፡ ለእያድ እንዲ አትከበተው እሳት እግል ለአትሳውሮ ለልትጸበሮ አንዝመት ሳኪን ልሳዕ ቀልቦም ምን መትጸባር ወዕንታቶም ምን አኖካይ ዑሩፍ ይህለ። ምር ምራዶም ውሕደት ወሰላም ሽዑብ ክሉ ረአሰ እግል ኢትህሌ፡ ምራዶም እት ረአሰ እብ ደም ለትመንክለ ሽዑብ እንዲ ገብአው

ስርቅ ወዘማቲ አተላላይ ቱ። ምን ክሉ ለልአሰፍ ህዩ እትጅሆም ክም በደ ምኖም ዲብ ለኢለአሙሩ ደያነት ለልትሰጀሉ፡ ኖሶም ለልትሐረዶ እብ ሰይፍ ለአበልሖ ክም ህለው ይአመሮቶም ቱ። አሰራር ፈዛዐት ዐቅሎም እብ ቃሎት ወአሰዋት ክም ትደበኤ፡ እበ ለኢገብእ እንዲ ሰክረው “እት እዲነ እንዲ ህሌነ ረቢ ለትከበቱነ ሕነ” እት ልብሉ አፍተዮቶም ህዩ ለአካቱ። አግዋሕ ለትሰጀለ ‘በዐል ደያነት አነ’ ለልብል እት ፈጅረተ እንዲ ፈግረ አሳሰ እበ ለአለቡ እት ለአፈቱ ጀረቦቱ ምን እግል ኖሰ ለትነፍዑ ፈዛዐት እዲነ ክም ሬመ ለልኦርኤቱ። ለሙፈክሪን ምን ኬን ስታር እንዲ ገብአው እብሊ አሰርም ለገብእ እት ልትሳሐቁ፡ ለእንዲ ኢደሌ ለተለ ህዩ አሰክ ለዐል እት ለአትቃምት እት ጸደፍ ለአቱ ክም ህለ እግል ልትርአዩ ኢቀድር።

ዐለምን አዜ፡ እብ መሳልሕ ወእምበል አምር ለትሰጀለው ሐዳይሰ ሙፍትዮት ባዝሓም ዲብ ህለው። ዐቅል ሽዑብ ክልዶል ልትረበሸቱ ለህለ። ዋይዲባት ደያነት ዲብ ገባይል ዐለም ብዘሕ ፍንጌር ክልቅ ክም ህለ እብ ዋዴሕ እግል ንርአዩ ወንሰምዑ ለብናቱ። ሽዑብ ወንዳል ኤረትሮፕ ሳኪን እብ ሰበት ደያነት ወፈህሙ እግል ለአድርሰ ለቀድር አለበ። ሰበቡ ናይ ሕርየት ግድለ ኤረትሮፕ እግል ደያናት ወእትጅሁ እብ ክቱብ እንዲ ኢገብኤ፡ እት ቃበት አረዊት እብ ደም ወትንፋሰ ቶም ለደርሰዉ ወለልአሙሩ። እብሊ ህዩ እግል ደያናት፡ ጅንሰ ወቆምያት ጀላል ወጠን ክምቱ እብ ፍዕል ዳርሳሙ ቶም።

እተ ለሐልፈ ናይ እስትዕማር ሰኖታት ልግበእ ወእትሊ ለህሌነ ዲብ ወክድ፡ እግል ተምሳል ሽዑብ ኤረትሮፕ እበ እኩይ እንክሩ እግል ልርአዎ ዲብ ልታከው፡ ግድለ ሽዑብ ኤረትሮፕ ሳኪን ተንሲቅ ሕበር ሽዑብ ኤረትሮፕቱ ለአርአዮም። ሐብር ተአምርተ ሽዑብ ኤረትሮፕ እግል ለሐምርን ለቀንጾመ፡ ባብ ወጣቀት ክልአዮም። ምን ኬን ሽዑብ ኤረትሮፕ ሙናድል እግል ደያነት፡ ጅንሰ ወዐድ ለመሰል ዋይዲባት ወአፍካር ለልአምሩ ኢህለ። ውሕደት ወብዝሐ ሽዑብ ኤረትሮፕ እግል ልቀይር ወእግል ሽዑብ ወሙናድል ኤረትሮፕ እግል ለአድርሰ አው እግል ልምራሕ ለቀድርመ ኢህለ።



ለኢትዮጵያም ዐዳወት እዳረት አሜርካ፡ ዲብ ረአስ ኤረትሮ (2ይ ክፍል)

እግል ሰነዎት ረዩም ለአተላላ ሃዳዎት አሜርካ ድድ ኤረትሮ፡ ዲብ ቀደም መጅተማዕ ዐለም ምን ልባስ ሕሸመቱ እንዴ ዐርቀ ለትፈደሐ ዲብ ወቅት፡ ምስል አንባቡት ወራር ህንዲዶ ወያኔ ዲብ ወራሕ ኖሽምበር ሰነት 2020 ቱ። እዳረት ባይደን፡ ኤረትሮ ምን አርወሐተ እግል ትዳፊዕ ለሀላ እግል ሐቅ ቃትን እንዴ ኬደት ወትረሰዐት፡ ዲብ ርአስ ሀይአት አርካን ውዛረት ድፋዕ ኤረትሮ ጀነራል ፊሊጶስ ወልደዮሃንስ ናይ በይነ ወቅቡልየት ቃትን ለአለቡ መኔዕ ፈርደት። እሊ እብ ዕልብ 14046 ለልትመር ፍርድ መኔዕ፡ እግል ትፈናተየ ዲብ ኤረትሮ ለልትረከበ መአሰሳት ወአንፋርመ ሀድፍ ለወዴ ቱ። እሊ አተላላይ ናይለ ለሐልፊ ከይናት ላቱ ዐዳዎት ወቅራራት ፍርድ መኔዕ፡ ጀራይም ወያኔ እንዴ ደብደብከ ወገላቡበከ ኤረትሮ እንዴ አትሐወንከ፡ መትሐምራግ ወመትብጭባጭ እሊ መንጠቀት ዲብ መስተቅበልመ ክም ኢለዓርፍ ወኢልትከለስ እግል ልናድሎ እቱ ለአመመት ከይነት ቱ።

እሊ እግል ጀአረት እዳረት አሜርካ ለለአርኤ ክቱብ፡ ኤረትሮ ምስል ቻይነ ወምስል ሩሰየ ለሀሌት እግል ዕላቀት ዲብሎማሰየት፡ ክምሰሌሁመ ኤረትሮ ዲብ መሓብር ዐለም እበ ለሀላ እግል ሐቅ ወቃትን ለተሀይብ ሶት፡ እግል ትምኔት አሜርካ ለኢተአይድ ወሐንቴህ ለኢትሰጅድ ሰበት ገብአት፡ ክምስለ ለለአግሄ መብጠር ሽሮሕ ዲብ ሀላ፡ ዋከት ኤረትሮ ዲብ ሄራር በራምጅ ዐማር መዐጽየት ምድር፡ ዝያረት ወዘር ካርጅየት ቻይነ ዲብ ኤረትሮ፡ ቻይነ እግል ኤረትሮ ለሀብቱ አብካት ምንሓት ተዕለም፡ ክም ተአምርተ ፈርሀት ውብቀት ወሰፋ።

እሊ ዐቅል ወእንሳንየት ለነቅሰየ ምኑ አፍካር ዐሚም ወዝልም ለከምከመ ክቱብ፡ በሊስ ቃሊ ለኢለአትሐዝዩ ወለበለ ሸክዋት ወመሰምስቱ። ኤረትሮ ዲብ ጽኑዕ ወመተንካብ እት አሜርካ ለተአምን ወዲብ ሕቅፊ ለትጨፍር አመት አሜርካ ኢኮን። እብ ናይ ቃትን ሐቅ እንዴ ትነፈዐት፡ ምስለ ለሐዘቱ ወለተአይደ ዱለት እት ለሐዘቱ ወቅት ወአካን ረአይ ቤንያይ ወሸርከት ሕበር በ ለትብለ ዕላቀት እግል ቱዴ ለከርዐ ወለመነዐ አለቡ። ኤረትሮ ለትታለዩ ዐገል ሰያሰት፡ እግል ሸቅል ወመሳሌሕ ሕበር ለከድም ሊኢኮን፡ እግል ይምይምት ሸንሀት ወአትመሞት ዐሚም ትምኔት እዳረት አሜርካ

እሶላሌ ለትብል ኢኮን። እሊ ፋግር ለሀላ አሰፍ ወዴብ ለኢልብል ክቱብ፡ እግል እሊ ናይ ኤረትሮ ዐገል ራቱዕ ወዕላቃት ቤንያይ እንዴ ሀመሽ፡ “ለናይ ኤረትሮ ወቻይነ መዓወነት፡ እግል አሜርካ ምን ናይ ዐለም አሀምየት ዐባይ ለበ ገበይ በሐር ቀየሕ ለተአትገዋኔ ወለትወንን፡ ሀለዮት ቻይነ ዲብ መንጠቀት ቀር-አፍሪቀ ለተአፊዬሕ ወለተአደቅብተ” እንዴ ልብል ክም ብቀት ቀድመ። እሊ ምስለ ዲብ ሰነት 1950ታት ሸዐብ ኤረትሮ ሐቅ ሕርየቱ ወእስትቅላሉ እግል ኢልርከብ ወክም ሰብ ወምስምስ ለትሸርሐ፡ እግል ናይ አሜርካ ሀደፍ ትምኔት ዐሚም ዐለም’መ ምን ገብእ ለኢነፊዕ መሰምስ ለልትማሰል እት ገብእ፡ እግል ኤረትሮ ዲብ በሐር ቀየሕ ለሀሌት እግል ተረት ወመስኩልየት ዲብ ሕሳብ ለኢለአቱ።

ለክቱብ እብ ተውሳክ፡ እግል ኤረትሮ፡ ክም ሰብብ ኢመስከብት አምን መንጠቀት ቀር አፍሪቅየ እንዴ ወሰፊየ ለለአትካፍእ፡ ወዲብ ቅብለት አቶብዩ ለሀሌት እግል ሐለት ወደቅብ እግል አትሐወኖት፡ ናይ ፈንተየት ወከሪም ምስዳራት መኔዕ በይን እግል ልትፈረድ ዲብ ለትጠልብ ማደት ካትብ ሀላ። እሊ ህዬ ምስለ ዲብ ዋቄዕ ለሀላ ተየልል ክሉ-ክሉ ለኢልትመሳኔ ወሰረት ካዋየት ለለሀይብቱ።

ለአማን ድድ እሊ ለትሸርሐ መረር ቱ። ሴድያይት ወያኔ እንዴ ገብአት ሐርብ ብዴ ወአብዴ እግል ለአምብት ምን ምረሐር ታክያት ፈላቂት እንዴ ረፍዐት ደርክ ወተአትሻክት ለጸንሐት አሜርካተ። ዲብ ሕኩመት አቶብዩ ናይ በይን አብጠሮት ሐርብ ዕልንት ዲብ ለዐለት ወቅትም ምን ገብእ፡ ክራም ወያኔ እብ ዳረኮት አሜርካ ለሕኩመት አቶብዩ ለወዴቱ አብጠሮት ዘብዋ እንዴ ኬደ ምን ሐዲስ ሐርብ ፈነ ወደማር እግል ለአንብት፡ ወዲብ ምንበር ሰልጠት አዲስ አበባ እግል ለአጠጫሕ ተሐዝዩ ክም ዐለት ለልትአመር ቱ።

እዳረት አሜርካ ዲብ ሐምረንት ሰላም ወአምን መንጠቀት ቀር-አፍሪቀ ለዐለት እሊ ተረት ዐባይተ። ዱለት ሶማል ዲብ ደግደገት ዕብር ወረማድ ጨበል ሞሻት ለቀየረ፡ እግል ዐስሮታት ሰነዎት ለአተላላ ላሞሽ-እደይ ክሶሕ ወአፍዓል ነጅሱ እብ ገበይ ቃትን ወፍርድ ዓድል ሐል ለገብእ እግሉ

ክላፋት ሕዱድ ኤረትሮ ወአቶብዩ፡ እግል ዝያድ 20 ሰነት ዲብ ፍዕል እግል ኢልተርጀም ለዐንቀፊት ወለሐለከት፡ ዲብ ቅብለት ቃረት አፍሪቅየ ሊብዩ፡ ምግባይ ምፍጋር ጸሓይ ክም ከረ ዒራቅ፡ ሱርየ፡ አፍጋንስታን ውብዕዳት ድወል ዐለም ለበጭበጨት፡ እምበል አሜርካ ቀሪም ብዕድ አለቡ። እሊ ሰምሐ ለኢተአስትህሉ ጀራይም ወዘንብ እሊ ንዘም ወንጹፍ ዲብ እንተ፡ አሜብዐ ሸንከት ኤረትሮ ወታውቶት፡ ዐቅል ለአለቡ፡ ምን ተጃርቡ ለኢደርሱ፡ ሚ ልብሉኒ ለአለብ ስያሰት ዐሚም ወጀአረት ለዐመዩ አፍካርቱ።

እሊ እዳረት አሜርካ ዲብ ናይ እንተርኔት ሰፍሓተ ኖሽረቱ ለሀሌት ለለአትካሌሕ ክቱብ ሐዲስ ምንመ ኢኮን፡ አዜመ ምን ገብእ፡ እግል በዲር ለአበረት ስያሰት ወለበሌት ዐዳወተ ዲብ ረአስ ኤረትሮ እግል ተአተላልየ ክም ተሐዜ ለለአክድ ቱ።

ሕኩመት ኤረትሮ ምስል ከሉ እሊ ዐዳዎት አሜርካ፡ እበ ለትትቀደር ገበይ ምስል አሜርካ ለሀሌት እግል ዕላቀት እግል አትሓደስ ሐድ መቅደረት ትትጸገም ጸንሐት። ገሌ ምን ብዙሕ፡ ርአስ ኢሰያስ አፍወርቂ አሰክ እዳረት ሕኩመት ርአስ ዶናልድ ትራምፕ ለለአከዩ፡ ወለልአስትህላ በሊስ ለረክበት ርሳለት ተሐይስ ተሐምቅ፡ ምናተ ለእዳረት ኖሰ እበ ለተአምሩ ሰብ ቀናዐት ለተሀይብ ፍገሪት እግል ትትረከብ ምን ኢቀድረት። እላተ ህዬ፡ እዳረት ሕኩመት ጆባይደን ዲብ መክተብ ሕኩመት በሀለት ዋይት ሃውስ ምን ተአቱ ወሐር፡ ለናይ ከይነት ወአከይ አፍዓል ዱብኢት መዕዩብ ሸቅለ እብ ደቅብ ወዕጹፋት ተአተላልየ ሀሌት።

እዳረት አሜርካ ዲብ ሐምረንት ሰላም ወአምን መንጠቀት ቀር-አፍሪቀ ለዐለት እሊ ተረት ዐባይተ። ዱለት ሶማል ዲብ ደግደገት ዕብር ወረማድ ጨበል ሞሻት ለቀየረ፡ እግል ዐስሮታት ሰነዎት ለአተላላ ላሞሽ-እደይ ክሶሕ ወአፍዓል ነጅሱ እብ ገበይ ቃትን ወፍርድ ዓድል ሐል ለገብእ እግሉ

እብ ሰብ መትአታይ አሜርካ ዲብ ረአስ ድወል ብዕድ ለጀረ ጀራይም



32^ይ ዊድ ሕርዮት ሼብ ሰወር



ምስትንክር ሄራር ሰባተት
32^ይ ሰነት ዊድ ሕርዮት



ዲ.ዛይን - ታላላቅ ኣብርሃ
ሰወር - ታላላቅ ኣብርሃ
ኣክሊሉ ዘርእዝጊ
ሳልሕ ዓብደልጃድር

የ-ም ለከድም ፈጅር ሸንጎን

ሸባብ



ነጃት ዑሰማን

ሕርየት፣ እት አትፋቃድ መስክልየት

ለምርኮብ ክም ሕልም ሌጠ ትትሐሰብ ለዐለት ሕርየት ኤረትርየ ምን ትትአከድ እላተ 32 ሐል አዶረት።

አምዕል ሕርየት አምዕል ዝክርያት ወገለድ ሳብት፡ አምዕል ፈርሐት ወጠንየት ወአምዕል ሰአየት ታመት ተ። ለኢልትክለስ መስል ለዐለ ለሐልፈ ግድለ ተሕረር፡ ለሐዘዩ ዐውል እስትሸሃድ ቃሊ ለንትዘክር ዲቤ፡ እግለ እለ መስክልየት እለ ለትአረፈዐናተ አማነት ክብድት፡ ዱልያም ወብቅዓም እግል ንግበእ ገለድነ ለነአጀድድ ዲብ ዕለት ፍንቲት ተ። ምን ሐረስ እለ ህዬ፡ እግለ ታክያት ወአሳስ ዐውቲ ላተ ለኢተአትካርም ሰአየት፡ ኤማን ሳብት ወመትሰባል፡ ግድላነ ወእስትሸሃድን እግል ንትዘክር፡ አምዕል ሕርየት መናሰበት ዐባይ ተ።

ናይ ዝያድ ሰር ዘመን ግድላነ ወትምኔትን እብ ዐውቲ ምንመ ተምም፡ ሕርየተ ወእስትቅላለ ለአከደት ወጠን ወሕኩመት ምንመ ነዐልን፡ ለናይ ብናእ ወጠን ለዐበ ሸቅል፡ እበ እምቡታመ ለህሌን መርበይ ወመትሰባል፡ እተ ናይ ደንጎበ ለልትሐዜ ሀደፋ እግል ነኡብጽሐ፡ መስክልየት ወጠንየት ራፍዓም ክም ህሌን፡ መብዓእ ኤማን እብ ኤማን እግል ዐማር ለልሸህድ ዲብ አማንተ።

እትለን ለሐልፈየ 32 ሰነት ሕርየት፡ ተጃርብ ብዘሕ እክእለ-ላም ህሌን፡ ሰበት እለ ክምሰለ ዲብ ናይ መደት ግድለ እግል ሕርየት እንዴ ሰበትን ለትጋደልን ወለተዐወትን፡ ይ'መ እግል እለ አርወሐት ቃልየት ለትደፈዐት እግል ወጠን፡ እብ እቅትሳድ ለትጠወረት፡ ሰላም ወረሀየት ለትመደደየ እተ፡ ጥውርት ዐድ እግል ኒደየ፡ እንዴ ሰበትን ምን ንትጋደል ወእንከድም፡ ለትትሐዜ ዐውቲ ዲብ ወቅት ሐጪር ክም እንረክብ ለለአትሸክክ ኢኮን።

ዲድ ሕርየት ወእስትቅላለ ዐድነ ነዐይድ እንዴ ህሌን፡ ክምሰል አዳም ወሸዐብ ዲብ መጅተማዕ ዐለም እንዴ ተሓበርን ወመጦሩ እንዴ ትረተብነ ነጻርር ክም ህሌን ለተአክድ እግልን ዕለት ናይረት ሰበት ተ፡ ምለዐል ኩሉ ዓያድን ለቀሌት አምዕል ነዐይድ ህሌን በህለት ተ። እለ ነዐይዱ ለህሌን 32ይ ዲድ ሕርየት፡ ዲብ መርሐለት ዐውቲ እንዴ በጽሐነ፡ እግለ ምን ገበይ ዐዳለት ወአማን ራይማም ለዐለው አባያምን ክሉም፡ ክጅል ዳምቀት ወውጽዔ ዐባይ እተ ለገልበብናሆም ዲብ መደት ነዐይደ እብ ህለዮት፡ ሕርየትን ዲብ መብዓእ አማን ወኤማን እንዴ ሰብተት፡ ተ። ሕርየት ዐውል ቃሊ እንዴ ደፋዕነ ሰበት ረከብናህ ህዬ፡ ምን መናሰባት ብዕድ ለትፈንተ ጠዐም ወተርጀመት ቆሪ ለበ አማንተ ተ። ሕርየት አማንት ወጠን ወአጅያል ሰበት ገብአት፡ ሰነት-ሰነት እግል ነዐይደ ወነሐሸመ ሌጠ እንዴ ይእንጉበእ፡ እግል ንዕቀብ ወደማንት አተላለየት መስተቅበለ እግል ነኡክድ፡ መስክልየት ክለን ክምሰልተ እግል ንትሀመል ኢወጅብ።

ሕርየት እብ ፍዕል እግል ትትአከድ፡ በደለ ለአለበ አርወሐት ቃልየት ለሰበለው እግለ መሐርበት ዐድነ፡ አማንቶም ዲመ እግል ትምበር፡ ለአማንቶም ራፍዓም ለህሌን፡ እግለ መጽእ ግም ሕርየት ዐድነ እንዴ ሐፈዝን ወዐቀብነ ሌጠ እንዴ ኢጉብእ፡ እብ ሀደፈ ሳብት ወዐቦት ወተጠውረ ለልትሐብናብ ወጠን እግል ንሰልሞም፡ ክል መዋጥንክ መስክልየቱ እግል ልርፋዕ ወዋጅቡ እግል ለአትምም ለአስትህሉ። ለገበይ እንዴ ጠፍሐት ወትወጤት፡ ዲብ ናይ ደንጎበ ሀደፍን እግል ንብጻሕ፡ መርበይን እንዴ ፈረገን፡ ለሄራር ረዩም ለለሐዜ ሸቅል ዐማር ወጠን እንዴ አንበት፡ ዐቦት ወዐማር ወጠን እግል ነኡክድ ምን ንትበገስ አስክ እለ 32 ሰነት ዋድያም ህሌን፡ ሰበት እለ ክምሰለ ሹሀዳ፡ ለዐባይ ገዛፍ ሒለት መስታዕምረት ሐቲመ እንዴ ኢትነቅስ ምን፡ ዲብ ምን ረዩም ሃስስ ዲብ እንቱ ልትረኡ ለዐለ ባነ ሕርየት እንዴ ለአትቃምቶ ለትሰበለው፡ እግለ እለ የም ነኡትዳውረ ለህሌን ረሀየት ወሰላም ክም እንመልክ ለአቅደረው፡ እለ ጂል እለመ፡ እብ ካህላት ወሰብር፡ ሒለቱ፡ መቅደረቱ ወለህበቱ እንዴ ከዐ፡ እግል እለ ለረክበዩ ምድር አማንት፡ እንዴ አገረመ ወኬረ ወርዝቀ እንዴ አብዘሐ እግል ውላዱ ክም ሰል'መ ኢለአትሸክክ።

እለ ዲብ ፍዕል እግል ነኡውዕል ለሰዴን፡ ዲመ አርወሐትን ንትሰአል። “ለናይ ሹሃዳን አማንት ሐድ አክል አዩ እትመማመ ህሌን!” እንዴ እምቤ ምን አርወሐትን እንዴ አንበትን፡ ደሚርን፡ መትሰባልን ወማዕጸምን እግል ንፈትሽ፡ መናሰበት ዲድ ሕርየት፡ መስክልየትን እግል ተአትፋቅደን ለትሰዴ ህያብ ቃሊ ተ!

እለ የም ዓመት ነዐይዱ ለህሌን 32ይ ዲድ ሕርየት ተ፡ የም ዓመት እግለ ሳደፈን ሲያሲያይ መታክል እግሉ እንዴ ጋብሀን እለ ሕናቱ ፈድል ውሕደትን ወዳይም ታሪክነ ህለዮትን ዲብ ዐለም አመርዴን። ህለዮት አሮት ምጅተመዕ ምስል ሰላም ወመስኩበት ወጠን ቱ ለለጸበጥ። ዲብ ሰላም ለዐምር፡ ዲብ ሰላም ልትዐለም ወዲብ ሰላም ውሕደቱ ለአተርድ ወለአደቅብ። እግል አሮት እዴን፡ እንዴ ይእንመድድ ወሰደውን ወሀቡን እንዴ ይእንብል እለ ሕነ ዲብ ርሕነ እንዴ አተንክብነ ዲብ ዐቢ ካድም ወጠነ ነኡተላሌ ህሌን። ለገእ ሸቅል ዲብ ዶሉ እግል ትክደሙ አው እግል ትሸቀዩ ሰኒ ክቡድ ተ፡ ሳኪን ፍሬሁ ዶል ትበልዕ ቱ ለዝያድ ትትረየሕ ወከም ከደምክ ለልትፈሀመክ። ከካድም የም፡ ፈጅር ከም ለአሸነፍ ወዲብ ዐባይ ደረጃት ናይ መስተቅበል ከም ለአበጸሐነ ሸክ ኢኒዴ፡ ከምን አጅል ካድም ወጠን ለዐበ ወቀይ ልጸበረን ህለ እግል እለ ዲብ ወግም እንዴ ኣቲነ ካድምን እግል ረሀየት ዲመ ዶል ገብእ ቱ ለመርሐለት እንበጽሕ ወምስል ዐለም ንትጃግር፡ ከመ ክሉ ለአምረ እለ ክሉ የም ራክብ ወጥወር ድወል ልትበህል ለህለ እለ ለሕነ ህሌን ዲብ መራሕል እንዴ ሐልፋቱ የም ድቁብ ወራኩብ ድወል ዐለም እንዴ ትበህለ ልትሰሚ ለህሌ። ክሕናመ ከመ እለ እንወዴ ህሌን እብ ድቁብ ካድም ህለዮትን እግል ንክደም እቡ ህለ እግልን። እትለ እዴን፡ ክሉ መክሉቅ አወል ወቀደም ክሉ ሰላም ወመስኩበት እግል ልርኩብ ልተብኔ ወሰኩበት ሐቆ ኢረክቤ እግል ልንበር ኢቀድር። ከሰበት እለ መስኩበት ተአትሐዜን ሌጠ ኢንዴ ኢትገብእ ምን ድሩሪ ከም ቱ እግል ንትረሰዕ ኢወጅብ። ሰላም ወመስኩበት ህዬ፡ እግል ንንበር ሸቅል ለአትሐዜን፡ ወእግል ንሸቆ ዓፍየት። ሐቆ እለ ክሉ ህዬ፡ እምበል ህትን እብ መዕጸም እግል ንሸቆ ለአትሐዜን። ክመ ክሉ ለአምረ ክሉ መክሉቅ ህዬ፡ እግል መዴሸቱ ልርኩብ ላለ ወአምዕል እምበል ሕላሌ



እንዴ ከድም ልትረኡ፤ እለ ህዬ ምንለ ነኡሽ መክሉቅ አስከ ዐበ እብ ሕበር ወፍንቱይ እግል መንበረቱ ለአሰኔ ክል አሮት ከእበ ቀደረቱ ‘እግል ልብለዕ ወልንበር እበ እለ’ቡ ሒለት ዲብ መንበረት እዲናሁ ፍሩር ልትረኡ። ሐቱ ኣካን እግል ነኡምረ ሉብነ ዲብ ከድመት ወሸቅል አወል ለልትረከብ ዲብ ፍሬ ተዐብቱመ አውለውየት ከም ትትሀየቡ እግል ንትረሰዕ ለአለብነ ሐቂቀት ተ። ከሕነ ከም ሸባብ እብ ናይ የም ተዐብ ወአናካይ ረዩም እግል ንትሻቀል ሉብነ ለሰላም ወመስኩበት ለዲብ አክልሕድ ነኡማድድ ወቅተ ወአምዕል ረዩም ከም ኢኮን እብ ለትፈናተ እሰባታት እግል ልትሐቀቅ እግልን ቃድር ህሌ። ዐጃይብ ቱ ዲብ አድመኖት ስያደት ወጠን፡ እት ብክእ ወተዐሚር ወዲብ ተዐለም እት ክሉ ወጠንያይ መጃል እት አድመኖት እቅትሳድ ወለ መስሉ ለቀደም ኣዜ ገብእ ዐለ ለሕቡን ታሪክ ዲብ ለትወረስ ዶል ትርኢ ደሚር ለረዶሕ ወእግል ናይ ረዩም መስተቅበል ሰአየት ወንየት ለለአወዴ ምህም ጋርተ። ከህለዮትን እግል ረዩም ለለአናኹ ወጥወር ሻብ ዲብ ጥውርት ደውለት እብ ሰላም ወመስኩበት እግል ልትመተዕ ለልጸበር ተ። ካድም ሸባን ኤረትርየ ማሌ ወየም ለአንበተ ኢኮን ምን አስል ቀዳምያም ለጸንሕ ወውርስ ናይ የም፡ ፈጅር ወሐቆ ፈጅር ከምቱመ አመሮት ወመትአካድ ለለአትሐዜ እለ ምህም ታሪክ ከምቱ እግል ነኡትፋቅድ ህሌት እግልን። ሰበቡ

ለአጅያል ለህይተ ከአሰር ለህይ ሰበት መጽእ ታሪክ ኣትፋቀዶት ወአውረሶት ምን ዐቢ ዲብ ንኡሽ ዶል ልትሐላለፍቱ ለህለዮት ታሪክ ልትአከድ ልብሎ ዑለመእ። ሕሸመት ወሐምዴ እግለ ክል ዶል እምበል ሕላሌ ሕላላ ዐቦት ናይ እለ ወጠን ለዋሉ ሹባን። ከሕነ ውላድ ሚን አደም፡ ምን ክሉ ሐዋናት እብ ዐቅልን ወፍክርን ለትፈንቱን እብ ግብአትን ዲብ ሸቅልናመ ለትፈንቱን ወለ ሒሰነ እግል ንግበእ ምን ድሩሪ ተ። ሹባንመ ህዬ፡ ክመ ውላድ አዳም ምን ሐዋናት ብዕድ ለልትፈንተዋ፡ ፈንቱያም ከም ሕነ ኢንትረሰዕ። ሰበቡ የም ዲብ ዕምር ሸበትን ለኢሸቄናህ ፈጅር ዲብ ዕምር ሸበት ከም በጽሐነ እግል ንሸቀዩ ለኢትሐሰብ ፍክር ተ። ከሕነ ክመ አርእስ መክቱብነ ለሸረሐ ወእግልን ለነፈዐን፡ የም ለከድም ፈጅር ሻንን ከም ቱ እግል ንትረሰዕ ለኢወጅብ ጋሪት ተ። ከሸዊየ ዲብ ታሪክ ቀዳምያም ሹባን ምን ነኡቀብል ምን አሮት እግል ዐንድቀነ ለቀድረ ምህም ታሪክን ተ። ሸባብን ምን በዲሮም ‘እግል ረዩም ምስተቅበል ለለአናኹ እብ ግብአቶም እለ የም ለዐውቱን ስታት ቀዳምያም ሌጠ ተ። ካድም የም ‘እግል ፈጅር ህዬ፡ ሐቱ ምን አግደ ሰቅራት ናይ ሸባብ ተ። ምን ሕርየት አስክ እለ የም ለህሌናህ አምዕል፡ ሸባብን፡ እምበል ህትን ወብቲክ ሰእየት፡ እት ወቅት ኢሰላም ወሐርብ፡ እግል አድመኖት ሰያደት ወጠን ወእግል ብናእ ወተዕሚር ናይ እለ ቃልየት ወጠን ተዐንደቀው። የም ምን እንትዕብ ፈጅር እንከሰብ እበ ልብል ሀደፍ እሉም እምበል ሕላሌ ከድሞ ህለውቶም። ታሪክ ወጠን፡ ውሕደት ሸዐቡ ለኢለዐቅብ ሻብ ምስተቅበል ከም አለቡ እግል ነኡምር ህለ እን። እብ ፈድል ስያሰት ሕኩመትን ወውሕደት ሸዐብነ ሚ ኢትሸቀ፡ ምስል ዐስር መሐለኪት ወመታክል ሰብ ዐዳወት ክሉ ሐልፈ፤ እብ መስተዕምረት ውላድ ጋነ ደማር እበ ጨበል ተሐተ ፋግር ለዐለ ዐድነ፡ የም እንዴ ትብኔት ሰኔተ ምን ውላድ ርሕመ ጋብአት ህሌት። ረያም ለዐለት እብ መዋሰላት ቀርበት፡ ያብሰት ለዐለት እብ ካድም ጠለት፡ ጭዊት ለዐለት እብ ሚርሒት ወዐዳለት ረትዐት፡ ጀህል እብ ዕልም ደመረ፡ ብሩር ወመዳይን ክሉ ምስል ከደማት እብ ሕበር ረክበ ወዲብ ሰኔት አማደዳ። ከእለ ክሉ እብ ሰብር ወከሃለት፡ እብ መሰባል ወውሕደት፡ ገብእ ለህለ ትሩድ ካድም ሀደፋ እግል የም ሌጠ ኢኮን እግል ዲመ እግል ውሉድ ወለደን ወረዩም ምስተቅበል ከም ቱ ኢንትረሰዕ።




አላህ! ለዘመን ገዱ ሐር እንዴት አላቀረምት ልትሄዱት ሀላፊ። ወክልሙ ቀዱ ቀደም አሴረራተ ከዲብላ ካልቅ ረቢ ለቤላየ ወለሐክመየ ለአጀራ ሀላፊ። ወለ ዝሩፍ ክም ምራዱ ባድላ ወቃደረ ሀላፊ። እለ ህዩ ዶልክ ምነ ነቢር ዲመ መሸገ ምነ ገብእ ርሐ ለለአትሀምግ እብ ሐቱ ገበይ ተ። ገሌ ልትጀደድ ወግሌሁ በሌ። ሰር አሮት ለሐዬ ወሰርመ መይት። ገሌህ እብ ሸበት ፈግሬ ወለዐንብብ። ገሌ ህዩ ገንድብ ወአሰክ አርድ-አልዐሙር ገዱ ሐር ለአትቃብል። ገሌህ እብ ረቢ ለሀበያተ ንዕመት ትፈራሕ ወትትለወቅ። ወብዕድ ህዩ ምነ እብ ምልሃሁ ለምም እቱ ለሀለ ፈነ ወብቲክ ሰእየት ጠሬዕ ወኢህ ልብል።

እግል ዓይሉት ብሻውሮመ ለዘመን እዴ ዋዲ ዲበ ዐለ። ለእናሰ ግድም ወድ ሕምስ ሰነት በጽሐ። ለገርቡ ህማር ለመ ዲቡ። ወለረአሱ ሺበት ትዘረአት እቱ። ጅሃዝለ ተነፍሱመ ሐሳሰየት ሰበት ወሰክ ህግያሁ በዝሐት ከእግለ ዓቅቡት ልትናህርም ወለኩብት ህዩ ለአመሸሽ ምናም ገበኤ። ምናተ ህቱ ክመ እተ አብዕረት መሰር ጠናግህ ወለሐናዴ እንድኢኮን ብዝሐት አዝየት አለቡ። እለ ህዩ ምነ ጠባይዐ ለዘመን እግል ልቀይረን ለኢቀድረ ክልኤ ሰፋት ታርፋት እሉ ሰበት ዐለየ ተ። ለፎጃጃ ወለ ኩብዱ ለባርሀት። ህቱ ሙፈትሽ ግም ናይ ሀረም ኹፋ ተ። ስሙ እት ሰሜት ለሺመቱ ወለአሳሚህ ገለዱ እንዴ ኢሊሓብር ለነቅሙ ያወይሉ። ህቱ ምን ህግየ እብ ርሐ ሰበት ኢመሸግ ዐደድ ሐሉቱ እብ ሰብብ ርሐ ለሀድግ። ወቅሸሽ ወቅብጥር ለብዲቡ ሀገጊት ቢታተን ኢፈቱ።

እብ ሰብብላ ዐለት እሉ ወዘፈት እት ቀደም ፈርዐን እግል ልብጠር ተሐዘ ምኑ ምን ገብኤ። ለከበር እት ኩሉ እግል ልብጸሕ እሉ ልትሸነህ። ፈርዐን ምነ ዐበ አሰክለ ነአሽ ወክሎም መለልሂቱ ወእት ሐን ረአሰቱ ለከድሞ ኩሎም ለከበር ክም ሰምዕም ወዴ። እለመ ኢከፍቶ ከእግል ናፈ ወኹነ ወደደፍ ክም እለ ልብሎም፡- “ህየ እለ ከበር በኪት እግል መለልሂትኩም ሓክወ። ወክም እለ አቡኩም እብ እክላሰ ወሸቅል ወውቅልት መቅደረት ለበጽሐየ ደረጀት እግል ትብጽሐ ህዩ ምን ንእሽኩም እት እንቱም ትባደር” ልብሎም። ምናተ ህቱ፡ ክልዶል እናሰ በኪት ወኩብዱ ባርሀት፡ ርሐ እኪት ለተአቤ፡ ወቀጥቡ ጠረፍ ንሳሉ ለኢልትዐዴ ዐለ።

ዛያመ እሲት ወለት አርበዐ ሰኖታት ገበኤት። ምናተ እለን ሰኖታት እለን ብዙሕ ትምቱማተ ይዐለየ። ጃላል ግርመተ ወዐቅለ ወፍድብናህ እተ አካኑ ዐለ። ጸንት ወሺመት ምነ ለኢልትቀየረ ጠባይዐ ገበኤ። ሮሻን ብሻውሮ እት ደይር ለልርእየ እለ እሲት ካርደ ለሸቃላይ ወከዳሚት ረደ ዴዲት ለዐልት እሲት ኢትመሰሉ። ህታመ እብጀህተ እለ ለናይ በዲር ሐያተ እት መቀማጥጥ

ተመህ ቀደር



ርሴዴ እንዴ ጣየመቱ በታተን እግል ኢትፍቀዱ መንገአት ዳብኢት ምኑ ዐለት። እለ ህዩ እብ እለ ናይ ሰልፍ ለውቀተ - እሙመት ደደፍ እግል ትትመተዕ ምን ሐዘት ሌጣ ተ። አማን ተሐይስ ምን ክትርመ ትርሕም እቱ ወትፈትዩ ዐለት ሰዕ ሸሀር እት ርሕመ ለረፈዐቱ ትመሰል። ወሰኔቱ እት ተሐዘ እንዴ ዐበ ምለዐል ሰናቱ እንዴ ገብኤ ልወቅ እት እንቱ እግል ትርአዩ ትተምኔ ዐለት።

ኹነ እተ ወቅት ለሀይ ዲብላ ውቁል ተዕሊሙ ገዱ ቀደም እሲፋር ዐለ። እት ቀደሚሁ እምበል ሰለሰ ናይ ተኸሱሰ ሰኖታት ሐቱመ ታርፍ ምኑ ይዐለ። ለመንደላይ እብ ጠቢዐቱ መስጢር እለ ኮን እግል ለአምር ወልድረሰ ለሐዘ ሰበት ዐለ። ከሁነት እግል ልድረሰ ሰበት ሐረ ዲብ ድራሰት ላሁት እግል ልትፈረር ቀረረ። ምናተ ለመስከለት እት ሕርዖኑ ሌጠ ለተአተንክብ ይዐለት። በሀለት ከሁነት ዕልም ሰኔ ዋሰዕ ወቅዙር ሰበት ቱ ዲቡ እግል ልእቱ ለሐዘ ደረሳይ - እት ረአሰለ ውቁል ድራሰት ወለ መጃላትለ ተኸሱሰ - ዲብ አሮት ናይ ውቅልት ድራሰት መዕሀድ እግል ገሌ ሰኖታት ለልትህየቡ ነዘርያይ ወዕልምያይ እኽትባራት እብ ደረጀት ፍድብነ እግል ልትዐዴ ዐለት ዲቡ። ኹነ ዲብ ወቅት ድራሰቱ እብ ለአርእየ ለዐለ ለባበት ወፈጣነት ወሕሙድ አደብ ለጠለቡ ኩብቱ ረከበ። ምን አቡሁ እምበለ ዕክት ክርኑ ሐቱመ ናሰእ ይዐለ። ለገርባዩ ሃምር ወቀጢናይ ዐለ። ምን ቃብል እግለ ልርእየ ሰኔ ሸሉጥ መሰል። ለሰፋቱ እብ ፈርሀት ረቢ ወሕሸመት አዳም ትትአመር ለዐለት ዋልዳይቱ ለአትፋቅደኩ።

ናፈ ሐሁ ላቱ እብ ዐክሰ እለ ዐለ። ምን አቡሁ ለርሹድ ገርቡ ወለገዱ ምሉእ ወየም አለቡ ምነ ጠባይዐ ዋርሰ ዐለ። ሰኔ መትድእላይ ወልወቅ ዐለ። ወበክቱ እንዴ ሰነ መማኒትለ ገርቡ ምን መማኒት ገርብ አቡሁ ለዕኩክ ወክቡድ ህቱ ካብ ቀልል ዐለ።

ለመንደላይ ለትወቀለት ሸሃደት ረሰም ወሰወሮት ትከበተ። እብ መሳዕደት ዋልዳዩ፡ ዲብ ሻሬዕ ሰንፍሮ - እለ አሮት ምነ አግደ ሙህማን ላቶም ሸዋርዕ መዲነት መነፍ ቱ - ሐቱ ቤት ትዛቤ። አካን ሸቅሉ ወነታጅለ ዐመሉ ለለአትዐፊ ዲብ አካን ወደየ። ወእብ ግሩም ኹዋ ሄርግሎፍየት “ናፈ ወድ ብሻውሮ፡ ኹሪጅ መዕሀድ ኹፋ

ናይ ፍኑን” ለትከተብ ዲብ ያፍተት እንዴ ሰቅለ እተ፡ እብ ሰብር እለ ሸቅሉ ለልትሸነህ ዐማዊል ልታኬ ወልትሐለም ዐለ።

ጃሙርካመ ምን እለ ውዳይለ ዘመን ኢደሐነ። ዐበ ወሰኔ ገዝፈ። ወለ ጭቀሩ ለጸለም ለገዱ ተሐት ለአድረዋሬ ዐለ ሐጭረ። ላመ ሐሊቱ ወለ ደቅቡ እተ ገዱ ልትአመረ ዐለየ። ለአረገቱመ አክል አዩ ቃሲ ወክለም ክም ቱ ለአሰእለ ዐለየ። ላመ ክርኑ ሰኔ ተሐደደት ወዐከት። ዶል ለእለ ነቤሐተ ለክርኑ ቃሎት ውቅልት ሰበት ትወዴ ለከረሻ ወለ ሐሻይል ወለደመሚት አልባቡ ነሰእ ምኑ ዐለ። ወእግል ኩሉ ሴምዓዩ ዓቅባይ ሮሻን ሙፈትሸለ ሀረም ፋዜዕ ክምሀለ ለዐልን ዐለ። ምናተ ምስል እለ ኩሉ ቀሳውቱ ወደቅቡ፡ እግለ መንባሁ ወፈታዩ ደደፍ ላቱ ምን ውልዋል ለሐምል ዐለ። ለምን ዘመን ንእሾም ዐለት እሎም ምስንዮት ሰኔ ወአማን እት ትትተረድ መጸት። ነቅመዩ ምን ገብእ እብ ሰዐይ መጽ ወአ’መረዩ ምን ገብእ ጠይዐ ወነሀረዩ ምን ገብእመ ረውግ ወለሀድእ። ወምን እለ ወኪንመ እብ አልባቡም ልትፋህሞ ወምራድ አሕድ ደሉ ዐለው። ደደፍ እብ ምልሃሁ እት ልትጫፈርመ ዓረ ምን ገብእ ጃሙርክ ልሸዕር እቡ ወእብ ሰዐይ ልትከቡቱ፡ እት ኩብዱ ለህሌት ምን ለዐል ለገበኤ ቅሩቡ ህቱ ለአ’ምረ ዐለ። ሙብሉጥ ክም ሀለ አመረ ምን ገብእ፡ ልትሳረር ዲቡ ወልትዳከክ እቱ። ወትዕብ ወማሸግ እት እንቱ መጸ ምን ገብእመ ሰበት ልፍህሙ እብ ምልሃሁ እተ ቀደሙ እንዴ አግሐመ ዘነቡ ለሻልሸ እለ ወእብ ረሕመት ለአትቃምቱ።

ደድፍመ ግድም ወድ ዐሰር ክልኤ ሰነት ገበኤ። ላመ ወቅት ለገበይ ለዲብ እለ እዲነ ነሰእ እግል ልሕሬ ዲቡ ወጅቡ ተመ ሌጠ። አማን ተሐይስ ቀዳማይለ መደት እለ እብ ክሰሱ እለ ሰኔ ከጠር ላተ መስከለት ሓሰበ ወሸቁልመ እብ ይዐለ። ዓመተን ላቱ እት ክል መዋዲቱ ሐምዴ ለአሰትህል ዐለ። ኹነ እብ እት ፈልሰፈት ለአርእየ ለዐለ ፈተ ሰበት ትቀሸሸ እምበል ከሁነት ካልእ ለሐሬ መሰሉ ይዐለ። ምናተ ናፈ ላቱ - ምን ሐረሰ ወኪን ለአቀምት ሰበት ዐለ - እት ለሐምስ ወእት ልትሳሰዴ ወእት ሰሴዕ ክለ ረአዩተ፡ ወለዕበያቱ ወለ ክምክምት ሓሊቱ አክለ ረአተ ልባሰ ዐሰከርየት እንዴ አልበሰዩ እት ልትካዩሉ “መሰሉ ለአለቡ ዐሰከሪ ቱ!” ልብል

ዐለ።

ምን ቅያሰ ወለዐል ልትፋተው ሰበት ዐለው ናፈ ለልብሉተ እምበል ሐቱ ክልኤ ልትከቡት ሰበት ዐለ። ደደፍ እለ ናፈ ለመርሐዩ’ባ ገበይ ሐረ። ዛያመ ርዶሕት እት እንተ ባረከተ እሉ። ምነ አምዕል ለሀ ወሐር እተ አውቃትለ ዓያድ እግል ዛየ አክለ ጅኑድ ወለ ፍራሰ ወፈላይለ ጃሽ ለበሰጠ ጋር በታተን ኢዐለ።

ብሻቅሮ ህዩ እለ ልሕሬ መሎህ ከበሩመ ናሰእ ይዐለ። እግል ኹነ ወናፋመ አሮቶምተ ክገበይለ ሙሰተቅበሉ እትለሐሬ ድኹል ዲቦም ይዐለ። ምናተ እት ለአሰተንትን ወእብ ምልሃሁ ለገዛፍ

ከርሸቱ ዲብ ጣሰሰ - ኩሎም እብ ሕበር እተ ናይ ወቅት ሐጋይ ቃዐት ግሱያም ዐለው - እግል ደደፍ ክም እለ ቤለዩ፡ “ደደፍ፡ ደደፍ ለአሰክ ማሌ ቅሩብ ታክብ ለዐላ ቱ እለ! እናሰ በዐል መሰኡልየት ገበኤ ከእብ ሐራን ዲብ እለ እዲነ ለነሰኦ ገበይ ረአሱ ለአደውር ሀለ። ለዘመን ሰኔ ኢትኬለመ ገብእ። የሀ ዘመን፡ ዲብ እለ ብሻውሮ ሰኔ ወአገርም። አሰክለ ሀረም እተ ካትመቱ ለአበጽሕ እብ ልጥፍክ ወሰትርክ ታለዩ። አሮ አካነቱ ለደብእ ትረክብ ኢመሰለኒ። ዛያመ እብ አንክረ ሸንሀተ ዲብ ተአሰእል ክም እለ ትቤ፡ “ብዙሕ ሱኣላት ኢተአብዝሐ። እለ ግሩም ገዱ ደደፍ ወለሮማይት ብጥረቱ ወእለ ሰኔ መማኒቱ ለልርኤ እግል ሐቱመ ዶል ትግበእ ዳብጥ ምነ ዱባጥ ዐጃላት ፈርዐን ኢረኤኮ እንዴ ቤለ ሸክ ኢወዴ!”

ልባብ

ለምክር ዐባይ

ዎሮት ነፈር ዲብ እማም አልሻፍዲ እንዴ መጽ፡ ከኩብር እተ ለሀለ ሓለት ሕግላን ወህቱ ሸቃላይ ክም ቱ ወእት አምዕል ሐምስ ደርህም ክም ረክብ፡ ወእለ ዮምየቱ ወለሐቱ ክም ኢትደብእ እሉ ደግመ እለ።

እማም አልሻፍዲ እለ ክም ሰምዐ እግለ እናሰ ዲብ ለአሸቄክ ለሀለ ነፈር እንዴ ጊሰክ ከለ ዮምየትክ ምን ሐምስ ደርህም እት አርበዕ ደርህም እግል ልብለሰ እክ ትሰኣሉ ቤለዩ።

ለእናሰ ለመስከለት ወለ ምን ኢፈሀመያመ ህቱ ላቱ ህግያለ እማም እንዴ ሰምዐ ክመ እለ ትበሀለ ወደ፡ ሐቆ መደት ለእናሰ ዲብ እማም አልሻፍዲ ምን ሐዲሰ እንዴ አቅበለ ክም እለ ቤለዩ፡- “ሼክነ አነ ለሓለትዬ እተ አካነ ህሌት ወለሐቱመ ኢትበደለት ዲብ” ቤለዩ። ህቱ ህዩ፡ ዲብለ ዐሚሁ እንዴ አቅበለ ከለዮምየቱ ምን አርበዕ እት ሰለሰ ደርህም እግል ልክረየ እሉ እግል ልትሰኣሉ መክረዩ።

ለእናሰ ሰኔ ፍኩር እት እንቱ ዲብለ ዐሚሁ አቅበለ ወክመ እማም አልሻፍዲ ለቤሉተ ወደ። ሐቆ መደት ለእናሰ ዲብለ እማም እንዴ አቅበለ ከዲብለ እለ ሀበዩ ምክር ብዙሕ ሐመደዩ ወለ ሰለሰ ደርህም ክሉ መሓግዙ እንዴ ባልሐት ሐቆሁመ ተአተርፍ እሉ ክም ህሌት አሰኣለዩ፡ ምናተ ለመስከለት እግል ልፈሰረ እሉ ጠልበ ምኑ። ለእማም ህዩ ክምእነ ቤለዩ፡- “ለሸቅል ለእሉ ጸብጥ ዐልክ ምን በዲሩ ምን ሰለሰ ደርህም ወለዐል ለአሰታህሉ ይዐለ፡ ለክልኤ ደርህም ለምንለዐል ትትከበተን ዐልክ ምን ሐቅከ ሰበት ይዐለዩ፡ እተ ማልክ ክም ተሓበረየ በርከት ከልኢያሁ፡ ከሐራም እት ሐላል ተሓበረ ምን ገብእ በርከት ለአሰእኑ ወሸቲተት ወድዩ” ቤለዩ።

ተብሰም

ዎሮት ሰኔ ህኩይ ላቱ ነፈር ዐለ። እሲቱ እግል ተአትጋዴ ሱግ ጌሰት። ሱግ እት ገይሰ መፍቴሕለ ቤት ትረሰዐቱ። ከዶለ ዕቅባለተ እግል ልፍትሐ እለ ለባብ ከርከሐት ዲቦም። ህቱ ህዩ ክርንለ ባብ



ክም ሰምዐ እግል ወልዱ እንዴ ነቅመ፡ “ቅነጽ ለባብ ፍትሐ” ቤለዩ። ህኩላል ጅናመ ምንተሐት ህኩት አቡሁ ሰበት ይዐለት ‘አቤኑ’ ቤለ ወእተ ምትክራሩ ትባለሰ። አዝመ ምኑ ወእግለ ወለቱ እንዴ ነቅመ ቅነጺ ለባብ ፍትሕዩ” ቤለዩ። ህታመ አቤት እሉ። ማን ወገለብ ትዋለበ። እት ደንጎበ ምነ ምትክራሩ እንዴ ኢቀንጽ እግለ እሲቱ፡ “የሀይ ወለት ሱብ፡ ምን እለ ዮም ወሐር እንቱ ሕድግት ህሌኪ” ቤለዩ ንብለኩም። ከረቢ ልነጃኩም። ህኩት ለትመክረህት ሕማም ተ፡ ወበዲርመ “ህኩይ ሐርኡ እብ ፍሸይ ለአከልሱ” ቤለው ሰብ መሰል።



ዕላመትን በናተ!

ሰኔ ትጃግምኩም ሰኔ ህሌኑ ተሐይሰ
ሕን ሰብ ደሐን ሕን እኩት ኢሃርሰ
ሰኔትተ ለእግለ እንወዴ ወእብ አፋነ እምበልሰ
እተ ጠፍሐት እነጽፍ ሽሙይ እንዴ ነሐስሕሰ
መድሐር ትረክብ ወምክር ግሰት ለሕነ እንጠሰሰ
እኩት በዐለ ትነሰእ ደለ ለአትበግሰ
ሕመትለ ገርቡ እት በፍተ ለማሰሰ።

ምልክ በይ'ናተ እለ አርደት መፈተይ
ኢንትሐበር እት ብዕዳም ወኢነአተቅብል ለመዐደይ
ወኢነሓብር ሰብ ጸብኢት እንኬብበም እብ መሐንደይ
ኢንትከደድ እብ እገር ኬደ ኢሕነ ወዕደይ
ገሀር ለታክሰ ሰሩር ኢልትጨቀም እት እደይ
ኢንትፈገዕ እብ ንሳል ወኢቀሸነ ቤት-እከይ።

እብ መደጊት ከሉለ እግል ትትቀሌ እብ ሃባት
ድበን እግል ትትረፍ ደንገር ወደራባት
አውሐዞት ሐንገል እግል በደ ሸባባት
ውሐዘ ለዐል ቃብል ዘበን ቃኑን ቃባት
ሕሳር ወአትፋርሆት ሕክሞም ማይ-ሸራባት
ምን ጎር ወሰብ ሰኔት ዳብኦ ዲበ ባባት።

ወጠነ እማነት ሳብተትተ ጽዕንት ኢኩን ደልደለ
መክሩህ ልትጋደበ ወበኪት ልትከተለ
ዕምርነ ወዕማርነ እግለ ዐለ ወሀ'ለ
ድርዐ ሕነ ወከሌበ ዲመ ንትከለለ
ከራዊ ለእ'መት ሸፍርነ እት ገበይ ንትቃበለ
ሓረ ነአደልዩ እኩት ለኢልትወዐለ።

ውላድ በዐለ ሕናቱ ወመናቢት ሺመተ
ምን ምድርነ ወነነ ሰብኦ ለአቡ ወሕርመተ
ወእለን ክልኤ መነቲት ቅርደ ወለንቅረተ
እለ ሹጡር መላትሐ ዕላመት ወግርመተ
እለ በርሸም ብሶተ እሻረትለ እምነተ
እግለን ለፈናቱ ምን ገበይ ደሐን ትሸተተ።

እሻረት ለእበ ንትአመር ወምን ቃብሎታት ትትለሌ
ፍንቲት ለእበ ንትፈገር ወሕባራት ይእንተሌ
ክም ተበቦ እንጸዕዴ ንትሰሐቅ እንዴ ንትቀሌ
ወእግል አርት ይእምበርክ እምበል እግል ንትሰሌ
ሰብ በሐር ሕነ ኢንትጨቀም ወኢነዐሌ
ወበሐር ሕነ ምንቱ ቅርድነ ለደሌ፤

ቀበት ሕባራት ይእንበዴ ወኢንትጌለል እብ ሸማል
እግል መክሰብ ጋነ ኢነአቦዴ ረአስማል
ሐቱ ቅንጽት ዶል ዐባይ አገር አፍሩሰ ወአግማል
ሐቱ እዴ እት ኬወ ፊራርነ እት ገማል
ኢነአትናጥጥ ግዋሬ ልሸህዶ እግልነ እብ ከማል።

ዕጫይ ክርቢታይ ዒጻት እሙ ዘብጠ ለፈግረ ምነ ቀበተ
ወሐር ኖሱ ሐሰ ለነድ እግሉ በሐተ
እዴ ኖሰ ብርድት ቅርትተ ምን ልርሕሙ ለሰሐተ
ሰኔት ሚ ተአስትህሉ ሰኔት ለኢሰተተ
አከይ-ወክድ ጠልመቱ ላመ ዘብጠ ፈርደተ
ሀዱድ ቅብለት እት ለሀድድ እት ምሕጋዩ አልሐተ
እት አርወሐቱ አቅበለ አስለሐት ለእግሉ ጎረተ

ቀብርመ ሰኔ ኢረክበ ሞተ ሞት አምበጠ።
ገርብ ብሩድ ለአትሃጌ ሸለት ለዐንደል ምብላሰ
ሰብክ አስክ በሐር ትምኔቶም ሐልፈት ቅያሰ
ቤት ሐየት ሐሺል ኢልእተየ ሕልሞም ዐለ ሕማሰ
ለበሐር ኖሰ ኢትረድዮ ፍጨል ትገብእ አማሰ
በሐር ቀየሕ ምን ሕንካሰ እት መንካሰ
ረሳሰ ጸለም ዋሕጠ አፋሆም ለእግል ዓሰ አግሀጸ።

ሰርነ ሺዱል ምን ጅወ ወሰርነ ሺዱል ምን በ'ረ
ብክር ዐሙር ሕዋሌ ምንቱ እብነ ለዐ'ረ
ለዐቢነ ኢተሀክ ወለንኦሽነ ኢአዋረ



ዌርሳይ ወድ ዌርሳይ ወድ አውረሰ
እት መባጥሩ በጥረ ምን ከራዊ ለትዘመተት አተክረ።

መሼደል ለውኑን ምን ምድሩ ተርፈ እቱ እብ ሰባት
ክልኤ ለምልተሕ ክልኦት ለዲን ክም ቀለም ወደዋት
ሰለሰ ለትከፈለ እግል ሰለሰ ውሕደት ወመሳዋት
ሰለሰ ናቅሰ ሰለሰ አለብናቱ መትከዋት
ሰለሰ ጀሚሶ ሰለሰ ናይ ሰለሰ ለአቅሊም መትቀዋት
ሰለሰ ዶል ሰለሰ ሰዕ ለቀውምየት ሐዋት
እሊቱ ምስጢር መሼደል ለአባይ ክልኦ መትዐዋት።

እብ ጀላብ ሐቱ አዳል ፈግረ ለብክር
ሰለሰ ዐስር እብ ሰባት ኢትዋለብነ እት ሸፍር
ሴዕ ለሐቱ ጎማትን ድሊት ደገምነ እብ ሰብር
ሴዕ ለእት ሰለሰ ክምኩማም ራዩት ሐበን እንሰቅል
ሴዕ ራብዓይ እግል ንክረዕ ክድመት ፋግራም ኢተዐብር
ሴዕ ማል ሳብዓይ ኢነሐዜ ነቅፈ እምቤ ምን ብር።

ግዊት ለራዲ ኢገንሐ ራዩትን ገለብ ነሳይብ
ሰለሰ ሰሉሰ እት እንተ እት ክል ምኖም ዐጃይብ
ማል ውላድ ወአርወሐት ኢህለ እግለ ለኢሃይብ
ትንፋሰ ክልኦት ለአስል ትንፋሰ ግርዝ ወሻይብ
ገለድተ ወማሕለ ወዕላመትን ሰብ ታይብ።

ኢሰምዐውን እት ነአስእል ትጻመመውን ቤልሰት ሐር
ኢትትዐቦ እት እምብሎም እብ ማል ፍክር ወነሐር
አልመ ከራብ ብዲበ ኢትትጀረብ እብ በሐር
ሆባይ ህለ እብ ምለዐል ለእሳት ሸይን ወስረር

ሐርማዝ ለእበ ንጎቱ ለዕጨይ ደቅቅ ወጨበል
ኢነህይበ እብ ቀላል ለአተንሱን እግል ነአስእል
ዘርእ ምንዲ ልትሐገል ሕነ እግለ እንበቅል
ወእበ ቀሰም ከሬነ ምነ ተወዝ ይእምብል።


እለ ጎርም ተሐይሶም ጤልመት እት ክል ሳንዩት
ኢንትቃረብ እብ ሞላድ ወኢንትሞለድ እብ ንዩት
አባይነ ነአምር ወሐነ ወግዋሬነ እብ አርድየት
ሰዶደትን ኢነአከይድ ወኢነአትሐምርግ ሕርየት
እብ ዕ'ነ ለሐቱ እንሰክብ ወዕ'ነ ለካልእ ዋርድየት
ምድርነ ኤረትርዩ ወሰሚትን ሸብብየት።

ጽጋብ ለሰፍረ ተሐይሱ ሰጋዱ ክምሰል ዓከከ
ሸዐብ ኤረትርዩ እግል ለአብዴ አፍከከ
ወሸዐብ ኤረትርዩ ጎማት መቀሌ ኢኩን
ጎማት ዋይት ሃውሰ ወክሪምሊን ፈርተከ
ሳለብናሁ እት በጥር ምን ማይት ወሕያይ ትበተከ
ጽዋር ቤለ እንክኖ ግድም አዜ አብረከ
ወንጽዐን ወንዕቀል ለሕርዶን እግልነ ተረከ።

ዐድነ ግወይ አዳመ ወዐድነ ግወይ አርደ
ሕድቱ ለቀበ እብ ብዝሕተ ኢቀርደ
ተሀዲድ ወአትሳቃር ተሰለም ሰላሕ ወልደ
እደይ ዐለም አትለሀበ ላመ እብ ሰአይ ሰንደ
ትግራይ ዐባይ እት ለሐዜ ትግራዩ ለንኢሸ ኡብደ
እሊቱ ውዳይነ እት ሰዶደትን ለተዐ'ደ።

ኢዳግመ እብ ሰላም እብ ሸፍ እ'ነ ለተውር
ጽምእ እንክህል ወሰፍረ ወክብድት ላተ እንጸውር
ዋዴሕቱ ሀደፍነ ኢልትበለል ወኢበውር
እብ መርባትን ይእንውዕል ወምን ሰልፍ ኢእንጀውር
ወአከይ ሻነ ለአመመ ሐንቱ ምድር ነአደውር
ዕላመትን በናተ ሐን ኢበድለ ወዐውል
ለሴዕ ክምሰል ዎሮ ወዎሮ አነን ዐስር።

ሰሌማን መሐመድ አድም
ምን ነቅፈ



ጅግራታት ቅዋት ድፈሪ ልተላሌ ሀላ



ካልኦይት ደውረት አሌላት ርዕደት ጅብህት ምፍጋር ጸሐይ፡ ለሐልፊዩ አምዴላት እት ባጽዕ ወወሰብ ትሉሊት ክም ዐለት ለበጽሐተነ ሐብሬ ተአክድ።

ጅምዐት እት መዲነት ባጽዕ እት ገብአ ጅግራታት ሾሊሶል አዋልድ፡ ፈሪቅ ሰዱሕ ዓለ እግል ኮከን ቀዬሕ፡ ፍልፍል እግል ራሰዱሚረ 2-0 ቀልበያህን። እት ናይ ውላድ ሾሊሶል ህዬ፡ ኮከን ቀዬሕ እግል ሰዱሕ ዓለ 3-1፡ ወመረብ እግል ራሰዱሚረ 3-2 ቀልበው።

እት ኩረት እግር፡ ፍረቅ ውላድ ፍልፍል ወኮከን ቀዬሕ 0-0 እት ልትፈናተው፡ መረብ ህዬ እግል አክሎም ንቀዋ ለዐለ እሉ ፈሪቅ ሰዱሕ ዓለ፡ እብ መተልህያህም ሰለሙን ዳዊት ዎሮ ጎል እንዴ አተው፡ 1-0 ቀልበው ከፈርግ ሰለሰ ንቅጠት ከሰበው። እት ናይ አዋልድ

ህዬ፡ መረብ ወሰላም 0-0 ዲብ ልትፈናተዩ፡ ፍልፍል እግል ኮከን-ቀዬሕ 2-0 ቀልበያህን።

እት ዐሰብ ዲብ ገብአ ጅግራታት ህዬ፡ እብ ሾሊሶል አዋልድ ፈሪቅ ቢሻ እግል ድራጎን፡ ሚራሰ እግል ዋልታ ሕድ እብ ትመስል ንቅጠት 2-1 ቀልበያህን። እብ ጀህት ውላድ ፈሪቅ ቢሻ እግል ዋልታ 3-0 ልትዐውቶ ዲብ ህለው፡ ድራጎን እግል ሚራሰ 3-1 ሳርሐምም። እምበል እሊመ እት ኩረት እግር፡ አሰክ እለ ቅሉብ ለኢህለ ፈሪቅ ሚራሰ እግል ራሰዱሚረ 3-1 ዲብ ቀልበም፡ አዋልድ ፈሪቅ ቢሻ እግል ዋልታ 2-0 ሳርሐምም።

እምበል እሊመ ዲብ ሊባን ገብአ ለአሰመነ ወራታት ርዕደት 'ቅዋት ዴሽ-ሻፍግ' ትሉሉይ አሰመነ።

እት ኮበሪት እግር አዋልድ፡ ቶክር ወመድሕን እምበል ጎል

ዲብ ልትፈናተዩ፡ አልጌን ላኪን እብ ወይኒ ገብሬመስቀል ክልኦት ጎል እንዴ አተዩ 2-0 ቀልበዩ። እብ ጀህት ውላድ ህዬ፡ ዘራ ውቶክር ለወደወ ትልህዩ አርበዕ ጎል ትሰጃለ ዲብ።

ፈሪቅ ዘረ ሰልፍ እብ ጎል መርሐ እት ህለው፡ ሐቆ ዕርፍመ እብ ዋእል እድሪስ ወሚሮን ገብሬመስቀል ክልኦት ጎል ሰበት ወሰከው፡ እግል እብ አማኑኤል ግርማይ አሮት ጎል ኡቱይ ለዐለ ፈሪቅ ቶክር 3-1 ቀልበዩ ከፈግረ። ፈሪቅ ባርዕመ እግል አልጌን 3-1 ቀልበዩ።

እብ ሾሊሶል አዋልድ፡ ብድሆ እግል ዓዲሮሶ ወባርዕ እግል መድሕን 2-0 ቀልባህን ዲብ ህለዩ፡ እት ናይ ውላድ ህዬ ሓፊና እግል ዓዲሮሶ፡ ወብድሆ እግል መድሕን እብ ሕድ መስል ዐውቱ 3-0 ቀልበው።

ፕሪመር ሊግ ዲብ አክር ሳምንቱ



ሊቨርፑል ቅባል ሳውዛምፕተን (4-4)



አስቶን ቪሊ እግል ብራይቶን (2-1)

ለድቁብ ፍረቅ እንግሊዝ ላቲ ፕሪመርሊግ፡ ለሐልፊ ሰነብት ናይ ሞት ወሐዮት ትልህያታቱ ዋዲ ዐለ። እትሊ ናይ ሰነብት ትልህያታት፡ ግሌሁ ፍረቅ ህለዮቲ

እት ፕሪመር ሊግ እግል ለአክድ ምን መትከራይ ዲብ ካልኦይ ድሺዝዮን እግል ልድሐን ናይ ክለ ሒለቱ ተልህ። መሰለን ኤሽርተን እግል

ቦርኔማውዝ 1-0፡ ቶተንሃም እግል ሊድስ ዩናይትድ 4-1፡ ክምስልሁመ ዌስትሃም እግል ሌስተር ሲቲ 2-1 እት ቀልበው እቲ ትልህያታት፡ ክል ፈሪቅ ዐደድ ሒለቱ ሰበት ተልህ፡ ለትልህያታት ሰኒ ሴሕባይ ወንወር አምሰ።

ፍገሪትለ ብዕድ ፍረቅ ዶል እንረኤ፡ አስቶን-ቪሊ እግል ብራይቶን 2-1፡ ብሬንትፎርድ እግል ማንቼስተር ሲቲ 1-0፡ ማንቼስተር ዩናይትድ እግል ፉልሃም 2-1፡ አርሰናል እግል ምልቭስ 5-0 ቀልበም።

ፈሪቅ ቼልሲ ምስል ኒውካሰል 1-1፡ ክሪስታል ፓላስ ምስል ኖቲንግሃም ፎሬስት 1-1፡ ክምስልሁመ ሊቨርፑል ምስል ሳውዛምፕተን 4-4 ፍትሳም ህለው።

ሰበት እሊ ፍረቅ ሳውዛምፕተን፡ ሊድስ ዩናይትድ ወሌስተር ሲቲ፡ ምን ጅግራታት ፕሪመርሊግ እንዴ ትከረ፡ ዲብ ካልኦይ ዲሺዝዮን እንግሊዝ ሒብር ህለ። ፈሪቅ ኤሽርተን፡ ቦርኔማውዝ ወኖቲንግሃም ህዬ እብ ሓይል-ማይል እት ዝናበትለ ሊግ ሓልፋም ህለው።

ርዕደት አቅሳም ውዛረት ድፈሪ አንበተት



መክሰቲለ ጅግረ

ጅግራታት ርዕደት አቅሳም ውዛረት ድፈሪ ማሌ ለህ አትኒን 29 ማዮ ዲብ ስታድዮም አስመረ እብ ነያረት ትከሰተ። እት ቃይድ ህይኦት አርካን ቅዋት ድፈሪ ኤረትርዮ ጀነራል ፍሊጾስ ወልደዮውሃንስ ወመስኡሊን አቅሳም፡ ዕዱማም ጋሽ ወርዶድዩን ብዝሓም ለሻረከው ዲብ መናሰበት ቲ ህዬ ለትከሰተ።

እሊ በርናምጅ ርዕደት እት ፍንጌ አንፋር መካትብ ውዛረት ድፈሪ ቀደም እለ ገብእ ምንመ ዐለ፡ እብ ሰብብ ኮቪድ-19 እትኩሩም ለጸንሐ ክም ቲ፡ ምን መመቅረሓይት ልጅነት ኮሎኔል ሰለሙን ገብሬልኡል ወደሐ። ዮም ዓመት ህዬ እግል ወሬሕ ለልሄርር ጅግራታት እንዴ ዝመ ብጉስ ክም ህለ እመር ህለ።

እት መናሰበት እንበተት ፍረቅ ውላድ ሳቡር ወአባሓኒ ትልህያህም ክም አንበተው፡ እብ ሰብብ ምሴት እት አስመረ ለዘልመት ዝላም ድቅብት ለትልህዩ ሐቆ ናይ 18 ደቂቀት ሄራር ሰበት አትካረመት፡ ዮም አርቡዕ ዲብ ሚዳን ካምቦ-ቺቼሮ እግል ትደገም ቲ።

እሊ ጅግራታት ርዕደት አቅሳም ውዛረት ድፈሪ፡ ኮበሪት እግር፡ ሾሊሶል፡ አትሌቲክስ፡ ክምስልሁመ ጅግረ ተንሺን ሰለሕ ለሸምል እት ገብእ፡ ሰለ ፈሪቅ ሻርት ዲብ ህለው። ፍረቅ አራግ፡ ሳቡር፡ አባሓኒ፡ ሂምቦል ወዲታሮ፡ እብ ውላድ ወአዋልድ ሻርት እት ህለው፡ ፈሪቅ ሐሊበት ላኪን፡ እብ ውላድ ሌጠ ክም ሻርክ ለበጽሐተነ ሐብሬ ተአፍህም።

ለፍረቅ ትልህያታቱ ዲብ ሚዳን ካምቦ-ቺቼሮ፡ ወመያዲን መዐስከር ደንደን እግል ሊደዩ ቲ።

ሻምፕዮን ኩረት ሰ' ከት ክተካክ

ሻምፕዮን ኩረት ሰለት (ባሰኬት-ቦል) አቅሊም ምግብ እት ሚዳን፡ ቦቾፊላ ሰነብት ክም አተላላ፡ ዕላቃት ሃም ናይለ ፈደሬሽን ሐበረው።

ሰንበት ንኢሽ ሳልሳይ ዲሺዝዮን ውላድ ASM -1 ቅብላት ASM -3 ትልህያህም አንበተው። ASM -1 ህዬ 50እብ21 ተዐወተ። ፈሪቅ ተሰፋ፡ እግል ASM -4 ህዬ፡ 40እብ28 ቀልበዩ።

ናይ ካልኦይ ዲሺዝዮን አዋልድ ፈሪቅ ዕዳጋ ሐሙስ እግል ሳሊና፡ 50እብ30 ተዐወተ ዲብ። እትለ ትልህዩ፡ መተልህያይት ዕዳጋ-ሐሙስ፡ ቅሳነት ዐንዶም ለሒስት መተልህያይት ትበህለት።

ሰንበት ዐባይ እት ገብእ ትልህያታት ሳልሳይ ዲሺዝዮን ፍረቅ፡ ውላድ፡ ኮከብ እግል ዊንርስ 36/28 እት ቀሉም፡ መተልህያይ ሪሞንድ፡ ወልዴሚካኤል 12 ንቅጠት ሰበት ሰጆሉ፡ ለሒስ መተልህያይ ገብአ። እብ ዐውቱ ፈሪቅ ኮከብ ሰናይ ፍሰሃይ 17 ንቅጠት ሰበት ሰጆሉ፡ ለሒስ መተልህያይ፡ ናይለ ምዕል ትሰመ።





ኡብ ሰባት ሰናዕያይት ሰውረት

እንዳስተርያይት ሰውረት ሐቲ ምን እለ እዲን እትሊ ባጽሐቲ ለህሌት ደረጃት እግል ትብጽሕ ለአቅደረየ ሰውራታት ተ። እለ ሰውረት እለ እዲን እለ ባጽሐቲ ለህሌት ተጠውር እግል ትብጽሕ ወእብ ተክኖሎጂ እግል ትጠውር ምን ለወደየ ሰውራታት ሐቲ ተ። እንዳስተርያይት ሰውረት እግል እብ እዲ ውላድ ኦዳም ልትሸቂ ለዐለ ወራታት ለበድል ማሸናት (ኣላት) እት ልትሐረክ እቲ ለዐለ ወክድ ክም ኦንብተት ልትኣመር። እብ ዓመት ላኪን እንዳስተርያይት ሰውረት ዲብ ሰነት 1760 ዲብ ብሪጣንያ ቱ ለአንበተት። ቀደም እንዳስተርያይት ሰውረት ኦንብተት ክሉ ሽዑብ እዲን እት ወራታት ሐርስ ለረከብት ሐያትቱ ሳይር ለዐለ። እት ወክድ ለህይ ዲብ እዲን ሐድ መሳኔዕ አው እንዳስተርያይት ለጠ ዐለ። እለ መሳኔዕ እለ

ምን ነኣይሽ መሳንዕ ናይ ቤት ለልሐልፍ ይዐለየ። ሐቂ ኦንብተት እንዳስተርያይት ሰውረት ላኪን ሽዑብ እዲን ምን እብ እዲ ልትሸቂ ለዐለ ኦሽየእ እት እብ ኣላት ለልትሸቂ እግል ልትዐዲ አሰብደ። እብ ሰባት እለ ህዬ፡ ገቢል ብሩር አስክለ መሳኔዕ ለዐለ እትን መዳይን፡ ሸቅል እግል ልሕዜ ትፈረረ። ኣለት ናይለ ዲብ ወክድ እንዳስተርያይት ሰውረት ለዐለ መሳኔዕ ሰኒ ድቁብ ወዲራይቱ ለዐለ። ለበዝሐው ሸቃለ እት ኦምዕል ምን 12 - 15 ሳዐት ሸቂ ዐለው። ናይለ ሸቃለ እትይ ድህር እት ረአስ ግብአቱ፡ ዲብለ ሸቅል ለሳድፎም ብቁት መ ድየት ልትደፍያ ዲብ የዐለው። እት ባካት 1800 ላኪን እት ብሪጣንያ ለዐለ ምህታት ወአሸቃል ቱክኒክ አስክ ክለ አርብ ወቅብለት አሜሪካ እግል ልትመደድ ኦንብተት። ተአሲር ናይ

እለ ህዬ፡ እት አሜሪካ ወእዲን ለሐሰት ሰነት ባቡር ምድር እግል ትትሸቂ ኣተቅደረ። ለካልኣይ ወጅህ ናይ እንዳስተርያይት ሰውረት፡ ምን 1850 ለአንበተት እት ገብእ፡ መፈክሪት እብ ለትወቀለት ደረጃት ወበቃዐት እግል ልትሐረከ ዲብ ወሐዲስ እግል ልርከቦ ለአንበተው ዲብ ቱ። ዲብ ክፍለት 1900 ህዬ እንዳስተርያይት ሰውረት አስክ ካምል ምድር ሩሰዩ፡ ግብለት ምውዳቅ ጸሓይ ኤሰየ ወቻይን እግል ልትመደድ ኦንብተት። እብሊ ወሎህይ ላኪን እት ናይ ሰልፍ ወክደ ኦንተህዞት ቅወት ኦዳም ወተዐብ ምንመ ዐለ ዲብ፡ እንዳስተርያይት ሰውረት ለአሳስያይ ተቅዩር እለ እነብረ ለህሌን እዲን እትሊ ባጽሐቲ ለህሌት ተጠውር እግል ትትዐዲ ለአተቅደረት ተ።

በህል እመራም

- “ወለ ክሉ ሸእ ድድክ ለትዐንደቀ ምንመ መስል፡ ጣኢረት ሄራረ እግል ተአተላሌ እት ዐስተር ለትዐስስ ቅብላት ሸማል እንዲኢን መጦር እትጀህ ሸማል ክም ኢትሄርር አመሮት እግል ለአትሐዜካቱ።” **ሄንሪ ፎርድ**
- “ሐቂ አፍካርን ኣተረድናቱ እዲን እግል ንቀይረ ለእንቀድር።” **ኖርማን ፒንሰንት**
- “እግል ትትዐወት ለኢትትሐለል ምርወት፡ ከህላት ትሩድት ወንየት እግል ተህሌ እከ ወጅብ። ከህላትክ ምሒጣት እግል ትትዐዲ፡ ወምራድክ ውቁል ረወሪት እግል ትትዐሮሬ እግል ልሰዴካቱ። ሀለዮት ምራድ፡ ቅወት ወምርወት ህዬ እብ አማን እት ለትተምነየ ዐውቱ እግል ለብጽሐካቱ” **ሰዋሚ ፔክንደ**
- “እግል ጽልመት፡ ጽልመት ኢትገልጽ፡ እምበል በርህት። ዐዳወት መ እብ ዐዳወት እግል ተአስክበ ኢልትቀደር እምበል ፍቲ።” **ማርቲን ሉተር ኪንግ**
- ሸቅል ምር ምን ግድዒ ናይ መናበረትክ እግል ለአሰኑ እግልክ ለቀድሮቱ። እብ አማን እግል ለተግነዐክ ለቀድር ላኪን ዐቢ ሸቅል ክም ሸቂክ ዶል ተአምንቲ። እለ ለገብእ፡ ለህለ እግልክ እግል ትፍተዩ ዶል ተአኑበት ቱ። እለ እብ ቀላለ እግል ቲዴ ኢቀደርክ ምን ገብእ ላኪን፡ ጌዳን ለአለበ ሩኣየት ተህሌ እግልክ።” **ፔለር ሰልድ**
- “እሳት እብ እሳት እግል ለአቅሰኖ ለቀንጾ፡ ጨበል ባርህ ሌጣቶም ለረክቦ።” **ማዘር ትሬዝ**

መብኒ ኢፈል ታወር



እት ደውለት ፈረንሳ ምን ለህለ መባኒ እብ ናይ ከደን ሸክሉ ሰኒ ግሩም ወጀዛብ ክምቱ ለልትህደግ እቡ ምር ኢፈል ታወር ቱ። እለ መብኒ እት ዓሲመትለ ደውለት ፓሪስ ለህለ እት ገብእ፡ እብ ቤጽሐቱም ምን ለዐበ መትዐጃብ ለቡ መባኒ እዲና ምርት ቱ። እለ እብ መናሰበት ዝክረት 100 ሰነት መትኦንባት ሰውረት ፈረንሳ ለትሸቀ መብኒ እንዴ ኦንብተት አስክ


ተምም ክልኤ ሰነት ወክልኦት ወሬሕ ወሐምስ ኦምዕል ነሰኦ። እለ ‘ኢፈል ታወር’ ለትብል ሰሜት ለትህየቡ ሰኒ ውቁል መብኒ ለትትዐጅብ ዕላመት መቅደረት ፈረንሳይን ክምቱ ልትህደግ።

ኢፈል ታወር ምን ደነግብ 19 ክፈል-ዘበን እንዴ ኦንብተት ምን ለተመው መባኒ እዲን ክምቱ ብዝሓም ምን ለአትዐጅብ ቱ። እብሊቱ ህዬ መሀንድሲን ፈረንሳ ዛይደት ሐምዴ ወዐጅብ እግል ለአትርፎ ምን ለአቅደረው ኦሽቃል እንዴ ትበህለ ልትሰሚ ለህለ። ኢፈል ክም ብዕዳም መባኒ እዲን እንዴ ኢገብእ፡ እብ ሸክሉ እግል ብዝሓም መሀንድሲን እዲን መስል ጋብእ ክም ህለ ወአስክ ዮም እብ ሸክሉ እግል ልትጃገሩ ለቀድር ፍንቱይ መብኒ ርኩብ ኢህላኒ።

ኢፈል ታወር ምር ምን ኦግደ ዕላመት ፈረንሳ እትገብእ እግል መዲነት ፓሪስ ሐቲ ምን እብ ቤጽሐት ውቁል እተይ ሰላዲ ለረክበ መዳይን እዲን እግል ትግበእ እትቅዱረ ህለ። ክል ሰነት ዝያድ

7 ሚልዮን ቤጽሐት ለልትከበት ኢፈል ታወር፡ ሰሜቱ ምን ኦግደ መኡሰሳዩ ክምቱ ለልትህደግ እቡ ገሰታሽ ኢፈል ለመጽት ክምተ ሰጅል ታሪክ ለሐብር።

ፍንቲ ሰወር ሕዘው



ሳድስ ወራር እብ ካርቱን



ኣግል ገዛርኻም ጸት ጥውራት መጻዕን ለገብር ሕንፋር “ጌርቲያ ለትብል ነገሌ ሙን ጸት ጸሐዮም ጋሻዮት ታ። ለጌርቲያ ሕዴ፡ ጸሐ ጸሐ ወበፋን ጸሐዲ ልገብሮ ክገቡዱ ዳገም ጠልብ ናምዎም። እት ልገንገ ምር ወርቂ ሓፍ፡ ደብ ዐባዩ መጻዕን ሕርብ ለገጠኡ ገሓራ ሓገም ዐለ። እለ ራት ወረር ለገንገር ወሰውሪትም ለገንገር ጸሐራ ሕጻን ገዛርኻም ልተፋ ጌርቲያ ውሳዩ ሃርፍ ሓይሌም ጸት ዐሳውም እለ ህዴ ተገምርቲ ናዓን ጌልትሓሳስ ጽህፈት ጌርቲያን ቱ ለዐለ።”